

## Adlis n Jusua

- 1 1 Awarn i umi Musa, ismey n Arbbi, tuya ixsi, inna Umqqrان (Arbbi) i Jusua, mmis n Nun axmmas n Musa:
- 1 2 Ismey inu Musa ixsi. Ekkar mneē abrid ekk x Jurdan da ak marra rgens a γar tmurt, id asen, ait Israel, γa wceγ.
- 1 3 Qaē mani, γa iadef uđar n wem, ad awem t wceγ, mamec i t eahdey i Musa.
- 1 4 Tammurt n wem ad iiri zi tnzruft ed zi Libanun γas ar iγzar amqqrان, γar Eufurat- marra tammurt n ait Hetit- ed γas ar din γar ill amqqrان, mani tγdji tfuct.
- 1 5 Ura ed ijj war izmmar a' cek isbedd, min γa tkked tddard. Mamec tuya ayi ak Musa, ad iriy ura ak idk. Necc war cek tjjij a' twđid war daik smmħeγ.
- 1 6 Iri d aryaz ed tmħdeđ! Maγar cek a' twced i rgens a tammurt n sen, xf tssned: Necc jjudjeγ i imzwura n sen, ad asen tet wceγ.
- 1 7 Iri waha d aryaz ed tmħdeđ ed thđid mliħ, aqqa a' tujurd nican ak wbrid, id ac iwca ismey inu Musa. War x afs xannes γar iffus ura γar zrmed, maħend a' tγeēded di marra, min γa tgged.
- 1 8 X wdlis a n rqanun rbda a' tssawared ed ass ed tmddit a' dais txmmamed, maħend a' thđid, a' ttgged ammu nican, mamec dais tura. Xenni a' γark iiri dg wbrid nnec zzhar ed ttisir.
- 1 9 War id ac bu nniγ: Iri d aryaz ed tmħdeđ? War tnxiē war tggwed; maγar Amqqrان, Arbbi nnec, aqge t ak idk di marra, min ttgged.
- 1 10 Uca issek Jusua imqqrانen idjan x listat di rgens:
- 1 11 Ujurt di arrħbet ed thsarm iwdan: Ajjwet rewetc; maγar di 3 n wussan a' tzwam Jurdan ssa, ħima a' tggwujem di tmurt a t tawiem, id awem γa iwc Umqqrان, Arbbi n wem, a' tiri n wem.
- 1 12 Ed i ait Rubenit, i ait Gadit ed i wzyen n tqbite n Manasse inna Jusua:
- 1 13 Sqret x min, ak idwem igga Musa, ismey n Arbbi: Amqqrان, Arbbi n wem, iwca awem arrsa (rhudnet) iwca awem tammurt a.
- 1 14 Timγarin n wem, iħnjirn n wem ed rmar n wem ad qqimen di tmurt, id awem iwca Musa γar manis id tnqqar tfuct x Jurdan. Kenniw maca a' din tujurm ak aytmatwem a' thzzmem ak marra iryazn izmmarn ad mmnyen γar zzat ad asen twcem fus,
- 1 15 γas ar id iwc Arbbi i aytmatwem rhudnet am kenniw ed γas ar ad ttfen ura ed nitni tammurt, id asen iticc umqqrان, Arbbi n wem, xenni ad tdwrem γar min idjan n wem, di tmurt id awem iwca Musa, ismey n Arbbi, γar Jurdan ajmmađ i nnqran n tfuct.
- 1 16 Nitni arrin x Jusua: Marra, min tqđbard, a t negg ed dihan, mani id aneγ γa tsskked, a' nujur.
- 1 17 Ammu nican, mamec nsra γar Musa, ad γark nser. Amqqrان maca, Arbbi nnec, ak idk iiri, mamec tuya idja ak Musa.
- 1 18 Qaē, wen γa iffaryden x uđbbar nnec ed war idfar marra ibridn nec, ad itwaney. Far iri d aryaz ed tmħdeđ!
- 2 1 Jusua, mmis n Nun, issekk zi Cittim s tnuffra 2 n ixbarjiyn idbbar: ujurt, xzart tammurt, war tettut abilaj Jeriku! Nitni ffyen iwden γar taddart n ict tqħbect trayan as Rahab; dinni xsen ad ssnsen.
- 2 2 Itwana i wjdjid n Jeriku: Tamddit a usind danita ca n iryazn, ait Israel, ħima ad xzarn tammurt.
- 2 3 Uca issekk ujdjid n Jeriku imsxxar γar Rahab ad as inin: Sufeyd iryazn, id iudfen taddart nnem; maγar nitni usind, ħima ad xzarn marra tammurt.
- 2 4 Uca tcsi tmyart iryazn tsuffar i ten. (I imsxxarn maca) tnaa nettat: Wah, iryazn usind γari; maca war ssineγ, mani tuya yen.
- 2 5 Umi tiwura n ubilaj γar wttu n tadjest ad twablēent, ujurn iryazn; necc war ssineγ maca, mani ujurn nitni. Đfart ten dyya, xenni tzmmarm ad x afsen thartem.
- 2 6 Nettat maca tiwi ten γar tzqqa iudarn tsuffar i ten sadu, wzraf x tzqqa.
- 2 7 Tuya arddfen iryazn, mnāen abrid n Jurdan, γar uszwi, tuya twablēent twura, awarn i umi tuya ffyen inni ten iarddfen.
- 2 8 Awrud ad warrcen iryazn, tgeēed Rahab γarsen γar tzqqa
- 2 9 tnaa asen: Necc ssneγ, aqqa Arbbi iwca awem tammurt a ed nggwed zzaiwem ed marra imzday n tmurt a tnyi ten tiggwda zzaiwem.
- 2 10 Maγar neccin nsra, mamec Arbbi issizeγ aman n ill n uyanim di ttwēē n wem, umi id tffyem zg Egibt. Neccin eawed nsra, min tggim akd Sihun ed Ug, ijdjidn n ait Amurit ayirin i Jurdan: Kenniw tkħħdem asen.
- 2 11 Umi nsra aya, ifsi wur nneγ ed marra iqgef daisen nnefs di ttwēē n wem; maγar Arbbi, Arbbi n wem, d Arbbi wen idjan snnej dg wjenna ed da swadday x tmurt.

- 2 12 Rxxu jadjēt ayi ɣar Arbbi, aqqa kenniw a' tggem ak twacunt n baba mliḥ, mamec i t ak idwem ggiɣ, ed twcem ayi r̄arbutn (aēdjem),
- 2 13 aqqa kenniw a' tjjem baba ed ymma, aytma ed yssma ed marra, min idjan n sen, ad ddarn ed ad aney ṭharrem zi tmnawt.
- 2 14 Iryazn arrin x afs: Neccin a' ntawer tudart nney x afwem, mara kenniw war tft̄them taywsa (tamsract) nney. Xmini id aney iwc Arbbi tammurt, ad am nsscen lmliḥ (rxir) nney ed raman nney.
- 2 15 X as uca tsyyeb i ten tm̄yart s ijj n wsyun zi rkazi x r̄hiḍ n ubilaj; taddart, di tzddeɣ tbna di r̄hiḍ n ubilaj.
- 2 16 Nettat traya asen: Ujurt ɣar idurar, maḥend inni x afwem iarzzun war kenniw tifen; dinni ffart 3 n wussan, ɣas a' tiri eqbend inni kenniw iḍfarn; Xenni tzmmarm a' tm̄nem abrid n wem.
- 2 17 Iryazn nnan as: Neccin nzmmar a' nt̄tef di reahed nney, zi id aney tsjadjed ɣar:
- 2 18 Xmi id ɣa nadeɣ tammurt a, egg asyun a azggway immuden ɣar rkazi, zi id aney tsyybed, ed tsmuned babam, ymmam aytmam ed marra twacunt n babam ɣarm di taddart nmem.
- 2 19 Qaē maca, wen ɣa iffyen zi twwart, falta (x iri nnes) nnes, mara twasizzren idammn nnes. Neccin xenni nnhra amarwas. Maca Qaē, wen ak idm ɣa iqqimen di taddart, a' x afney narbu afaryeḍ (falta), mara itwasars x afs ufus.
- 2 20 Ura mara cem tssufyed tayawsa nney, war nt̄tef di reahed, id aney tjjid a' njjadj.
- 2 21 Nettat tarra x afsen: Ad iiri, mamec tnam kenniw. Xenni tji ten ad ujurn uca tcedd tazra (asyun) tazggwayt ɣar rkazi.
- 2 22 Iryazn ujurn ɣar idurar; dinni qqimen 3 n wussan, ɣas ar ami tuya id eqben dg wbilaj inni ten iḍfarn. Ina tuya arzun x afsen mani ma, maca war ten ufin.
- 2 23 Xenni arkkwḥen 2 nni n iryazn. Nitni hwand zg idurar, zwan Jurdan uca usind ɣar Jusua, mmis n Nun. Nitni ḥajan as marra, min tuya zrin,
- 2 24 ed nnan: Arbbi igga aney tammurt a marra dg wfus; marra imzday n tmurt a wḍan s tiggwda zzainey.
- 3 1 ɢar utffu zic iarrez Jusua ak marra ait Israel zi Cittim. Umi nitni iwḍen Jurdan, ssnen dinni, awrud a t zwan.
- 3 2 Awarn i 3 n wussan ujurn xefek n listat (rquqyad) dg wkwartir
- 3 3 ggin x ryaci: xmi ɣa tzarm maleta n reahed n Umqqrn, Arbbi n wem, ed ixhanen ait Lewit, i t iarbun, xenni ura ed kenniw a' ssni tarzem, mani tjam rxxu ed tdfarm tet;
- 3 4 ɢar kenniw a' tjjem ttasie n 2000 n iyadjn (rdruē) jar awem ed nettat, war ɣars tadset. Ammu a' tssnem, abrid ɣa tkkem; maɣar kenniw zic emmars war tkkim abrid a.
- 3 5 Ed Jusua inna i ryaci: Sizdget ixf n wem; maɣar tiwcca ad igg Arbbi rburhan jar awem.
- 3 6 Ed i ixhanen inna asen Jusua: Ecsit maleta n reahed ed tizwarm i ryaci! Nitni csin maleta n reahed ed tizwarn i ryaci! Nitni csin maleta n reahed ed izwarn i ryaci.
- 3 7 Uca inna Arbbi i Jusua: Ass a ad kkary, a' cek ssm̄yary zzat i tiṭṭawin n marra Israel, maḥend marra ad eqren, aqqa necc ak idk iriy, mamec tuya ayi ak Musa.
- 3 8 Cek maca a' tgged x ixhanen, iarbun maleta n reahed: xmini ɣa tawḍem ɣar tma n Jurdan, adfet di Jurdan ed tbdem dinni!
- 3 9 X as uca inna Jusua i ait Israel: Asttiwd awru ed tsrem awaren n Umqqrn, Arbbi n wem!
- 3 10 Xenni inna Jusua: S man aya a' teqrem, aqqa ijj n Arbbi iddar aqce t jar awem: Netta ad iazzer x ait Kananit, ait Hetit, ait Hiwit, ait Berisit, ait Girgacit, ait Amurit ed ait Jebusit jar tiṭṭawin n wem.
- 3 11 Xzart, maleta n reahed n Arbbi n tmurt tmun tizwar awem di Jurdan.
- 3 12 Arcḥet rxxu 12 n iryazn zi tqbbar n Israel, ijj ijj zi tqbite!
- 3 13 ɢar ad bdden iḍarn n ixhanen, iarbun maleta n seahed n Arbbi n tmurt tmun, dg waman n Jurdan, id ihkkwan zi sennej, ad irin axmi qssen ad bdden am r̄hiḍ.
- 3 14 Armi xenni rgens (ryaci) iffey tixuzan nnes iarrez, ḥima ad izwa Jurdan, ujurn ixhanen, iarbun maleta n reahed, ɣar zzat qaē n rgens.
- 3 15 Ed umi iḥmmarn n maleta iwḍen ɣar Jurdan ed iḍarn n ixhanen, iarbun maleta, ḥaḍan aman- Jurdan tuya di marra anbdu issfi x tmawin-,
- 3 16 uca bddent r̄hmrat n Jurdan. Aman id ihkkwan zi sennej bdden am ijj r̄hiḍ iggweɣ aṭṭas, ɣar ubilaj Adam, iudsen Zaretan. R̄hmrat itsyyḥen (ithnuccurn) ɣar ill n Araba, ill n isnt (tamdjaḥt) bddent qaē ed rgens izwa Jurdan ajmmad i Jeriku.
- 3 17 Ixhanen, inni iarbun maleta n reahed n Arbbi, bdden, xwansu marra Israel izwa s iḍarn uzɣen di raman dg wammas n Jurdan x tmurt tuzey, ɣas ar ami tuya marra rgens izwa Jurdan.
- 4 1 Umi tuya marra rgens izwa Jurdan, inna Arbbi i Jusua:
- 4 2 Arcḥet zi rgens 12 n iryazn, ijj zi tqbite,

4 3 ed tggem x afsen: Ecsit da, dg wammas n Jurdan, mani bdden ixhanen di raman, 12 n izra, csim ten ak idwem dihan ajmmaḍin ed tsarsem ten mani, ḡa tssnsem tamddit id ḡa iasen.

4 4 Uca iraya Jusua i 12 n iryazn, tuḡa ifarz zg ait Israel, ijjen zi tqbite,

4 5 inna asen: Ujurt ḡar zzat i maleta n reahed n Arbbi, Arbbi n wem, ḡas ar ammas n Jurdan; dinni ijj ijj ad icsi ijj n wzru x tḡḡrut nnes, maḡar n izra anect n min idjan n tqbbar n ait Israel.

4 6 Ad irin d jjurret (sinya) jar awam. Mara ssqsan kenniw tiwcca iḡnjirn n wem: Min xsen ad inin izra a i kenniw?,

4 7 xenni arret x afsen: (Nitni xsen ad inin,) aqqa rḡmrat n Jurdan zzat i maleta n reahed n Arbbi tuḡa axmi qssent; umi nettat tzwa Jurdan, tuḡa rḡmrat n Jurdan axmi qssent. Ammu izra a d jjurret n reḡran i ait Israel.

4 8 Ait Israel ggin, min tuḡa id asen inna Jusua, ed csin 12 n izra zg wammas n Jurdan, maḡar, anect n min idjan n tqbbar n Israel, mamec igga Arbbi x Jusua. Nitni iwien ten ak idsen ajmmaḍin ḡar mani ḡa ssnsen ssarsen ten dinni.

4 9 Ed dg wammas n Jurdan isqudjej Jusua 12 n izra, dinni, mani tuḡa bdden ixhanen, tuḡa iarbun maleta (rqabsa) n reahed; nitni bdden dinni ḡas ar iḡa.

4 10 Ixhanen maca, iarbun maleta, qqimen bdden dg wammas n Jurdan, ḡas ar ami tuḡa immsar marra, min tuḡa igga Arbbi x rḡens zi Jusua (marra ammu, mamec tuḡa igga Musa x Jusua), ed rḡens icsi dg wḡar nnes izwa ajmmadin.

4 11 Umi tuḡa marra rḡens izwa ajmmaḍin, tzwa ura ed maleta n Arbbi ajmmaḍin ed ixhanen (ujurn eawed) izwarn i rḡens.

4 12 Ait Rubenit, ait Gadit ed wzyen n tqbite n Manasse ujurn ḡzzmen i wmnḡi ḡar zzat i ait Israel, mamec t x afsen tuḡa igga Musa.

4 13 Tuḡa ten di 40 000 n iryazn snḡen, inni iffḡen jar tiḡḡawin n Arbbi ḡar umnḡi dg wazaḡar n Jeriku.

4 14 Dg wass nni issmḡar Arbbi Jusua di tiḡḡawin n marra Israel tuḡa twqqarn t, mamec tuḡa twqqarn Musa dg wussan nnes.

4 15 Uca inna Arbbi i Jusua:

4 16 Ini i ixhanen, iarbun maleta n reahed n Arbbi, ad ffḡen zi Jurdan.

4 17 Uca igga Jusua x ixhanen: Ffḡettiwd zi Jurdan!

4 18 Umi rxxu id ffḡen ixhanen, iarbun maleta n reahed n Arbbi, zg wammas n Jurdan ed iḡarn n sen ḡadan tma, uca dwren waman n Jurdan ḡar blasa n sen dwren ssfayen x tma am awrud.

4 19 Rḡens izwa Jurdan dg wass wiss 10 zg wyur amzwaru iwta iqyḡan di Gilgal, ḡar wftas tmurt manis id tnqqar tfuct.

4 20 Di Gilgal isbedd Jusua 12 n izra, tuḡa id ak idsen csin zi Jurdan.

4 21 Netta inna i ait Israel: Mara ssqsan iḡnjirn n wem tiwcca ibabatn n sen: Min xsen ad inin izra a?,

4 22 xenni ad asen tḡmem: Da Israel izwa Jurdan s iḡarn uzḡen;

4 23 maḡar Amqqran, Arbbi n wem, issizeḡ aman n Jurdan jar tiḡḡawin n wem, ḡas ar ami tuḡa tzwam ajmmaḍin, ammu mamec t igga Ajahw (Jahwe), Arbbi n wem, ak ill n uḡanim, issizeḡ jar tiḡḡawin nney, ḡas ar ami tuḡa nzwa din.

4 24 Di man aya ad ssnen marra rḡnus n tmurt, aqqa fus n Arbbi idusn (ijhed), ed kenniw x afwem ttggwdem Jahwe, Arbbi n wem di marra ussan.

5 1 Marra ijdjidn n ait Amurit aḡirin i Jurdan mani tḡdji tfuct ed marra ijdjidn n ait Kananit ḡar ill sran; aqqa Arbbi issizeḡ aman n Jurdan jar tiḡḡawin n ait israel, ḡas ar ami tuḡa zwan ajmmaḍin; uca ifsi wur n sen ed marra ibedd asen nnefs x ait Israel.

5 2 Dg wussan nni inna Arbbi i Jusua: Egg ijj n rmuss s wzru ed tarredd aḡjjem (aqartu) n ait Israel, wiss 2!

5 3 Uca igga Jusua rmuss s wzru iqartu i ait Israel x “twrirt n trmect”.

5 4 Jusua idwer itqartu nnit, minzi marra rḡens, tuḡa id iffḡen zi Egibt, ixs ad iini iryazn, marra inni itmḡyan, awrni ufuy n sen zi Egibt tuḡa xsien (mmuten) akd wbrid di tnzruft.

5 5 Umi id iffḡen rḡens, tuḡa ten marra ḡjjmen. Marra maca, inni awarn i ufuy zi Egibt id itwarwen di tnzruft, tuḡa war twahjjmen.

5 6 Maḡar 40 n isggwasn ait Israel ggurn di tnzruft. ḡar unggar tuḡa marra rḡens, marra iryazn n umnḡi, tuḡa id iffḡen zi Egibt, xsien (twanyen), minzi tuḡa war srin ḡar tmijja n Arbbi. Arbbi tuḡa ijjudj asen, war ten itjji bu ad zarn tammurt, tuḡa igga ad iwc s tjadjit i ibabtn n sen, ict tmurt, di tazzren aḡi ed tammnt.

5 7 Iḡnjirn n sen, inni ijja Arbbi xrfen ten, iḡjjem asen Jusua, maḡar tuḡa war id asen ḡjjmen akd wbrid.

5 8 Umi marra rgens tuya itwahjjem, qqimen dinni, dg wkwartir (rezib), γas ar ami iryazn tuya ggnfan.

5 9 Ed Arbbi inna i Jusua: Ass a kksey x afwem rfdihet n Egibt. X uyenni qqarn as i wazruy nni γas ar ida Gilgal (adγar n wnjär).

5 10 Umi tuya ait Israel γarsen iqydan di Gilgal, ggjn aydud n Bassah (Basax) γar tmddit n wass wiss 14 zg wyur di wazayar n Jeriku.

5 11 Dg wass awarn i Bassah, dg wass a, ccin iyrumn war ismimen (nnhra antun) ed tywawin zi ryidjet n tmurt.

5 12 Zi tiwcca nnes, awarn i umi tuya ccin zi ryidjet n tmurt, tnnqdeē Manna; zi ssni ait Israel war γarsen tqqim ead Manna, mayar nitni ccin dg wsggwas nni zi ryidjet n n tmurt n Kanaan.

5 13 Umi tuya Jusua γar Jeriku ixzzar, izra ijj n waryaz γars sable (uzzar acmrar) dg wfus ibedd zzats. Jusua iruh γars issqsa t: Cek ma zzainey niy zg isnga nney?

5 14 Netta iarredd: Urid ammu, nec d azdjif n reskar n Arbbi. Necc rxxu ead id usiy. Uca iwda as Jusua γar idarn, hima a t iwqqar, issqsa t: Min iarzzu mas inu zg ismey nnes?

5 15 Azdjif n reskar n Arbbi iarra x Jusua: Ekkes tisira nnecc; mayar mani tbded, d amqddes. Ed Jusua iggi t.

6 1 Tiwura n Jeriku qqiment blleent s zzkrun di ttweē n ait Israel. Ura ed ijj war izmmar ad iffey ura ed ijj war izmmar ad din iadef.

6 2 Uca inna Arbbi i Jusua: Xzard, necc ggiy ac Jeriku ed ujdjid nnes s marra iryazn n umnyi nnes dg wfus.

6 3 Kenniw ak marra iryazn n umnyi a' tndem i wbilaj ad as tqwwarm ict twara Aya a t tged 6 n wussan.

6 4 Sa (7) n ixhanen ad izwarn i maleta n reahed s 7 waccawn n ihuriyn. Dg wass wiss 7 a' tndem i wbilaj 7 n twarawin ed ixhanen ad sude dg waccawn.

6 5 Xmi γa sude dg waccawn ed kenniw a' tsrem zzhir n waccawn, ad arrez rgens imun s uyuyi dg wjenna n umnyi. X as uca ad iwda rhid n ubilaj, xenni a' x afs izwa rgens, ijj ijj γar tmasext isbhen.

6 6 Uca iraya Jusua, mmis n Nun, x ixhanen inna: Ecsit maleta n reahed ed tjem 7 n ixhanen ad izwarn s 7 n waccawn n ihuriyn i maleta n Arbbi.

6 7 Ed i rgens (ryaci) inna netta: Nndet i wbilaj ed tjem iryazn ihzzmen s wuzzar ad ujurn γar zzat i maleta n Arbbi.

6 8 Ed immsar ammu, mamec tuya inna Jusua i rgens: 7 n ixhanen arbun 7 n waccawn n ihuriyn zzat i Arbbi tsude dg waccawn am ggurn ed maleta n reahed awarn asen.

6 9 Iryazn ihzzmen s wuzzar izwarn i ixhanen, itsude dg waccawn, wi iqqimen idfar maleta ed tsude dg waccawn nnhra asbdi.

6 10 X rgens maca igga Jusua: War syuyut war sskkarat bu rhess Ura ed ijj n wawar war id itffey zg wqmmum n wem γas ar ass, di id awem γa iniy: Ecsit dg wsuyy n umnyi! Xenni tsuyyem.

6 11 X as uca ijj maleta n Arbbi a' tunnuđ i wbilaj ed ad as tned ict twara. Xenni dwren γar wkwartir (rezib) ssnsen dg wkwartir.

6 12 Zic γar utffu irrez (iffey) Jusua ed ixhanen arbun maleta n Arbbi.

6 13 Sa n ixhanen arbun 7 n waccawn n ihuriyn γar zzat i maleta n Arbbi tsude dg waccawn nnhra asbdi. Iryazn ihzzmen s wuzzar izwarn asen ed wi iqqimen idfar maleta n Arbbi. Tsude dg waccawn nnhra asbdi.

6 14 Ammu unnuđen eawed dg wass wiss 2 ict twara i wbilaj ed dwren eawed γar wkwartir. Aya ggjn t 6 n wussan.

6 15 Dg wass wiss 7 maca ffyen γar utffu zic ujurn, am rbda, nnden i wbilaj 7 n twarawin; γar dg wass nni nnden i wbilaj 7 n twarawin.

6 16 Umi ixhanen γar twara wiss 7 sude dg waccawn, inna Jusua i rgens: Syuyyet i wnyi! Mayar Arbbi igga awem abilaj dg wfus.

6 17 Abilaj s marra, min dais, ad ithha i rwqar n Arbbi. Far taqhbect Rahab waha ed marra, inni γars idjan di taddart, ad qqimen ddarn, minzi nettat tsuffar ixbarjiyn (imsxxarn), inni tuya nssekk.

6 18 Hdāt maca ixf n wem, min γa itwathhan (itwanyen), a' kenniw iywa uynni a t tcsim; niy ad awiem akhheđ i wkwartir n Israel a t tydrem di arrzyyet.

6 19 Marra ury ed nnuqart ed rquē n nnhas ed wuzzar ad twasddqen i Arbbi ad asen di rkenz n Arbbi.

6 20 X as uca isuyy rgens i wnyi ed waccawn n ihuriyn twasude. Umi rgens isra i waccawn, isskkar tuyyit n umnyi. Rhid n ubilaj ihdem, ed rgens iudef dg wbilaj, ijj ijj γar tmasext isbhen. Ammu ttfen nitni abilaj.

6 21 S usabli (uzzar acmrar) iqdee n̄yin marra, min tuya dg wbilaj, iryazn timyarin, ih̄hramn ed iwssura, iynduzn, tixswin ed iyyar.

6 22 I 2 nni n iryazn, tuya ixzarn tammurt, inna Jusua! Ujurt yar taddart n tq̄hbect ed tawiemd snni tam̄yart ed marra, min idjan nnes, mamec kenniw id as tjjudjem.

6 23 Uca ujurn ih̄udriyn, ixbarjiyn, iwicend Rahab, babas, ymmas, aytmas ed marra, min idjan nnes; nitni ssufyen marra wi idjan zi twacunt nnes (zg wbilaj) ggin asen mani ya qqimen barra i wkwartir n Israel.

6 24 Abilaj maca ed marra, min tuya dais, sskarn dais timssi; yar nnuqart ed wury ed rqcue n nn̄has ed wuzzar iwien ten yar txrit n rkenz di taddart n Arbbi.

6 25 Taq̄hbect (rq̄hba) Rahab ed twacunt n babas ed marra, min idjan nnes, iiji ten Jusua ddarn. Ammu tq̄qim twacunt nnes tzddec̄ yas ar ida dg wmmas n Israel; mayar Rahab tuya tsnuffar imsxarn, inni tuya issekk Jusua, h̄ima ad xzarn Jeriku.

6 26 Dg wzmz nni ijjudj Jusua: Itwaxza yar Arbbi aryaz, wen ya iarzun, ad isbedd Jeriku a twara nneyni. Ad itwarza dg wmnzu nnes, mara netta igga as djsas nnes, ed umazuz nnes, mara netta isbedd tiwura nnes.

6 27 Arbbi tuya t ak Jusua ed wassay nnes iujur di marra tammurt.

7 1 Ait Israel maca csin zi min, tuya idjan i wth̄hi. Mayar Axan, mmis n Karmi, mmis n Sabdi, mmis n Serax, zi tq̄bite n Juda, icsi zi min, tuya idjan i wth̄hi. Aya isskkar axyyeq n Arbbi x ait Israel.

7 2 Jusua issekk zi Jeriku iryazn yar Ai, idjan yar Bet- Awen, yar manis id tydji tfuct x Bet-El, inna asen: Gædet, ed txzarm tammurt! Iryazn ujurn gæden xzarn Ai.

7 3 Umi id eqben yar Jusua, nnan as: Nnhra ma igæed din marra rgens. Amnni a' din gæden 2 niy 3 000 n iryazn; nitni zmmarn ad arnan Ai. War tegg bu a' dinni iujur marra rgens! Mayar dinni yar drus n iwdan.

7 4 Ammu gæden zi rgens amnni 3000 n iryazn yar Ai; maca ad arwren zg iryazn n Ai.

7 5 Iryazn n Ai n̄yin 36 zzaisen; innec̄yni d̄farn ten zi twwart n ubilaj yas ar tarzzit n wzru ed n̄yin ten yar tsawent. Uca ifsi wur n rgens idwer d aman.

7 6 Jusua icarreg aruð nnes iwda ak iwssura ztat i maleta n Arbbi s uymbub yar tmurt iq̄qim dinni yas ar tamddit imedd. Mitni arddjen iyged̄ x uzdjif

7 7 ed Jusua inna: Uh Arbbi, Arbbi inu! Maimmi tjjid rgens a ad izwa Jurdan? H̄ima ad aney tgged dg wfus i ait Amurit, mahend ad aney th̄han? Iri ngga, nq̄qim ayirin i Jurdan!

7 8 Uh Arbbi, min ya iniy, awarn i umi iarra Israel aerur yar isnga nnes?

7 9 Aya a t sren ait Kanaan ed marra imzday n tmurt ed ad aney unnuðen ad kksen assay nneç̄ di marra tammurt. Min txsed xenni a' tgged i wassay (isem) nneç̄ amqqrان?

7 10 Uca inna Arbbi i Jusua: kkar bedd! Maimmi da tmdded, s uymbub yar tmurt?

7 11 Israel igga ddnub. Nitni ffaryðen ead akd r̄qarin (reahed) inu, i ak idsen ggiy. Nitni csin, zi min, tuya idjan i wth̄hi; nitni ucarn t; nitni h̄wwsen t ggin t n sen.

7 12 X uya war zmmarn ait Israel ad sbdden isnga n sen uca ssenen asen aerur; mayar rxxu nitni simant n sen aqqa ten i wth̄hi (tm̄nyiwt). Necc war ddikkwireç̄ ad idwem iriy ead, mara war tkkisem zg wbrid marra min yarwem, n min tuya idjan i wth̄hi (kh̄hed).

7 13 Ekkar! Sizdeg rgens ed tinid: Sizdget ix̄f n wem i tiwcca! Mayar ammu i issiwer Arbbi, Arbbi n Israel: Γark, Israel, idja min war ih̄rin. Cek war tzm̄mard a' tsbddd̄ isnga nneç̄, min ya tkkem war tssiggwjem marra, min idjan i wth̄hi, x afwem.

7 14 Tiwcca astiwd taq̄bite taq̄bite ed taq̄bite, ya iedjem Arbbi, ad tas twacunt twacunt ed twacunt ya iedjem Arbbi, ad asent tudrin ed taddart, ya iedjem Arbbi, ad asen im̄yarn (izdjifn n tudrin).

7 15 Γar wen ya iafen, min idjan i wth̄hi, ad immndar netta ak marra, min yars, di tmssi, minzi netta inndsar x r̄qarin ed igga di Israel ict tmgga n rfd̄ih̄et.

7 16 Jusua iija yar utffu zic ad asent taq̄bite taq̄bite; uca ttwaedjem taq̄bite n Juda.

7 17 Xenni iija netta tiwacunin n Judas ad asent; uca ttwaedjem twacunt n Seraxit; xenni iija ad tas twacunt n Seraxit; uca ttwaedjem Sabdi.

7 18 Xenni iija ad tas twacunt s iryazn nnes; uca itwaedjem Axan, mmis n Karmi, ayyaw n Sabdi, mmis n Serax, zi tq̄bite Juda.

7 19 Jusua inna i Axan: Mmi, ewc i Arbbi, Arbbi n Israel, ræzz (ccan) ed nemed zzats! Ini ayi nnhra tiggwda, min tggid cek, ed war x afi snuffara walu!

7 20 Axan iarra x Jusua: Aqqa d tidett, necç̄ ggiy ddnub akd Arbbi, Arbbi n Israel. Necc ggiy ta ed ta:

7 21 Necc zriy sadu zzardet iij n ubartssu issbeḥ̄ zi Cinar, ed 200 Cekel n nnuqart ed iij n barra n wury, iwzzen 50 Cekel. Necc iejeb ayi esiy t yari. Aq̄qet di txzant (tq̄yðunt) inu inder di tmurt, nnuqart swadday qae.

7 22 Jusua issekk imsxxarn ed nitni ujurn γar txzant, s tidett: rħwayej tuya yen di txzant n Axan ndren, nnuqart swadday qae.

7 23 Nitni ssufyend marra zi txzant, iwien t γar Jusua ed marra ait Israel uca sswjden t zzat i Arbbi.

7 24 Uca Jusua icsi Axan, mmis n Serax, ura ed nnuqart ed ubartssu ed barrat n wurγ, iħnjirn ed yssis, iynduzn nnes, iyyar ed rbhayem, taxzant nnes ed marra agra nnes. Netta ed marra Israel iwien marra γar talat (tsdjya) n Axur.

7 25 Xenni inna Jusua: S min zi id ancy tydred di ticti, zzais iyder cek Arbbi ass a di ticti. Ed marra Israel ihjjar Axan. (Nitni ndarn ten di tmssi hjjarn ten.)

7 26 Sbdde x afs ijj n ueurric d amqqrn n izra, wen idjan γas ar ass n ida, ed Arbbi iija zg wxyyeq nnes ithduduqen. X uyenni qqarn as i tmurt nni γas ar ass a (ida) Axurtal (talat n ticti, tsdjya n ticti).

8 1 Xenni inna Arbbi i Jusua: War tnxrie war tggwed! Ecsi marra iryazn imħden, effey ed tujurd γar Ai! Xzar, necc ggiy ajdjid n Ai ed rgens nnes, abilaj nnes ed tmurt nnes dg wfus nnecc.

8 2 Cek a' tged ak Ai ed ujdjid nnes, mamec tggid ak Jeriku ed ujdjid nnes. Maca agra nnes ed rmar dg wbilaj tzmarm a ten tawiem. Egg dg werur n ubilaj ict tessast!

8 3 Uca iarrez Jusua ak marra reskar iujur γar Ai. Netta ifarz 30 000 n iryazn ikkin amnyi issekk i ten γar tmddit

8 4 s uwssi: Xzart, gget taessast γar werur n ubilaj, maca war itiri iggwej x ubilaj. Dinni ħzzmet!

8 5 Necc maca ak marra ryaci, γari idjan, a' nizwar γar ubilaj, ed mara xenni ffyend ak idney am twara tamzwarut, ad narwer zzaisen.

8 6 Nitni ad ancyd dfarn, γas ar tend nssiggwej x ubilaj, mayar nitni ad xarsen: Nitni arwren zzainey am twara tamzwarut. Xmi zzaisen γa narwer,

8 7 xenni kenniw ad arrzem zi dffar ed a' tetffem abilaj. Arbbi, Arbbi n wem, ad awem t iwc.

8 8 Xminni xenni a' tiri tetffem abilaj, a t tssaryem s tmssi. Egget mamec inna Arbbi! Xzart, necc ggiy x afwem aya.

8 9 Xenni issekk i ten Jusua uca xnsen γar mani tydji tfuct x Ai, jar Bet-El ed Ai. Jusua maca iqqim tamddit γar ryaci.

8 10 Zic γar utffu ikkar Jusua ibedd, ismun ryaci uca iffeγ ak iwssura n Israel γar uzdjif n ryaci γar Ai snnej.

8 11 Marra reskar iggeed ak ids iizwar γas ar zzat i abilaj. Snnej (zrmed) i Ai wtin iqydan; jar asen ed Ai ict tsdjya.

8 12 Xenni icsi amni 5000 iggi ten nani tydji tfuct x Ai, jar Bet-El ed Ai, γar dffar.

8 13 Ammu i sbdden ryaci: Akwartir tuya t zrmed i wbilaj ed tessast (anuffar) γar mani tydji tfuct x ubilaj. Jusua maca issedu tamddit swadday di tsdjya (talat).

8 14 Umi izra aya ujdjid n Ai, iarrez ak iryazn n ubilaj γar utffu dyya iffeγ s rgens imun nnes γar (umi qqarn) azaruy n wjraw zzat i azayar, ħima ad immney akd Israel. Netta war issin, aqqa tuya ggin as dg werur n ubilaj ict tessast.

8 15 Jusua ed ait Israel jjin ix f n sen twawten arwren din γar tnzruft.

8 16 Rxxu marra rgens, tuya idjan ead dg wbilaj, ikkar idfar i ten. Nitni dfarn Jusua uca ammu ssiggwjen ten x ubilaj.

8 17 Ura ed ijj war iqqim ijura di Ai (ed Bet-El); marra ffyen, jjin abilaj nnhra ħttu dfarn ait Israel.

8 18 Uca inna Arbbi i Jusua: Swizzed s usabli dg wfus nnes γar Ai, mayar ad ac t ggeγ dg wfus. Jusua iarra s usabli dg wfus nnes γar Ai.

8 19 Arami netta iswizzed s ufus nnes, arrzend iryazn zi dffar dyya, bbcen dg wbilaj, tffem tet sskarn dais timssi.

8 20 Umi iryazn n Ai nnqrbend, zrin ddxan iuri γar ujenna zg wbilaj. Maca nitni war zmmarn ad arnin γar zzat ura γar dffar ed war γarsen mani γa iarwren. Mayar inni (ryaci), tuya iarwren di tnzruft, innqrebd akd inni ten idfarn.

8 21 Umi Jusua ed marra ait Israel zrin, aqqa ddxan iggeed zg wbilaj, aqqa iryazn iffarn tuya tffem abilaj, eqben wtin iryazn n Ai.

8 22 Mayar minzi ina tuya kkarnd ak idsen zg wbilaj, tuya yen rxxu zi 2 n iyzdisa jar ait Israel. Ait Israel wtin ten, aqqa war zzaisen iqqim ura ed iijen ead, tuya izmmarn ad injem ad iarwer.

8 23 Ajdjid n Ai maca mneen t iddar ed iwien t γar Jusua.

8 24 Umi ait Israel tuya nyin marra, imzday n Ai, inni tuya ten idfarn, zi ttarf dg ijar ed di tnzruft s usabli iqdeen tuya marra wdan, dwren ait Israel γar Ai nyin ura ed dinni marra s usabli iqdeen.

8 25 Tuya dg wass nni marra 12000 n inni itwanyen, iryazn ed tmyarin, marra imzday n Ai.

8 26 Jusua maca ishwi fus nnes di idja usabli, γar ar ami tuya inya marra imzday n Ai.

8 27 Rxxu rmar ed wagra n ubilaj csin ten ait Israel d zzardet, x uwssi tuya iwca Arbbi i Jusua.

8 28 Xenni issary Jusua Ai iiji t i rbda d rxirbet ed rxra; iqqim γas ar ass n ida.

8 29 Ajdjid n Ai iija maca a t ajren γar usklu; dinni iqqim iujer γas ar tamddit. Umi tfuct tyri, csin rxcbet mamec inna Jusua zg wsklu ndarn tet γar twwart n ubilaj. Sbdden x afs ijj n uaurric d amqqran n izra, idja ead ida.

8 30 Dg wzmz nni isbedd Jusua x wdrar Ebal i Arbbi, Arbbi n Israel, missa (altar)

8 31 s wzru war iarzen tuγa war t ihidi ead wuzzar, ammu am Musa, ismeγ n Arbbi, tuγa i t iggin x ait Israel ed mamec tura dg wadlis n rqanun (Tura) n Musa. X missa a iwiend din i Arbbi t̄baxur t̄yarst n usizdeg.

8 32 Ed Jusua iarceg dinni x izra tira zi Tura n Musa; netta iura jar tiṭṭawin n ait Israel x afs.

8 33 Marra ait Israel ed iwssura, rquyyad ed rqaḏit, bdden γar iγzdisa n maleta n reahed zzat i ixhanen ait Lewit, inni iarbun maleta n reahed n Arbbi, arni γarsen rbarrani ed ait bab tmurt. Ijj n wzyen zzaisen tuγa isswe γar wdrar n Garizim, wnneγni γar wdrar Ebal, mamec tuγa igga Musa, ismeγ n Jahwe zic i wbarek n ait Israel.

8 34 Awarn as iyra Jusua marra Tura, ttisir (rbaraka) ed wxzi, nican ammu, mamec tdja dg wadlis n Tura.

8 35 Zi marra, min tuγa igga Musa, war idji ura ed ijj n wawar, war t iyri Jusua γar wjraw; ura ed timyarin ed ihnjirn imzzianen ed rbarrani, inni ak idsen iffyen, tuγa yen din.

9 1 X man aya sran marra ijdjidn ayirin i Jurdan, x idurar ed wazayar ed γar marra timwwin n ill amqqran γar ar Libanun: ait Hetit, ait Amurit, ait Kanaanit, ait Beresit, ait Hiwit ed ait Jebusit.

9 2 Nitni munen, ḥima ad meawanen x Jusua ed ait Israel.

9 3 Umi imzday n Gibeun sran, min tuγa igga Jusua ak Jeriku ed Ai,

9 4 ggin rebra (tisndect). Nitni emmarnd rḥwayej, arbun tixuncay tiburay ed iyccurn iburay itwajbarn x iyyar n sen t̄ffen abrid.

9 5 Nitni qqnen tisira n rbari, itwaḏarrfen ed ibartssutn iburay. Marra ayrum γarsen di rewetc tuγa iuzey itfruruy.

9 6 Ammu ujurn γar Jusua dg wkwartir γar Gilgal uca nnan as i netta ed ait Israel: Neccin nusedd zg ict tmurt tiggwej. Egget ak idneγ ijj n rqarin!

9 7 Uca arrin ait Israel x ait Hiwit: Teini kenniw tzddyem dg wammas n tmurt nney. Mamec nzm̄mar ak idwem negg rqarin?

9 8 Nitni maca nnan i Jusua: Neccin d ismyan nrec. Jusua issqsa ten: kenniw d man yin ed manis id tusim kenniw?

9 9 Nitni arrin x afs: Ismyan nrec usind zg ict tmurt tiggwej, iwi aneyd ccan n Umqqran, Arbbi nrec. Neccin nsra x ccan nnes ed marra, min igga di Egibt,

9 10 ed eawed x marra, min igga netta akd ijdjidn n ait Amurit ayirin n Jurdan, akd Sihun, ajdjid n Hecbun, ed akd Ug, ajdjid n Bacan di Actarut.

9 11 Uca nnan aney iwssura nney ed marra imzday n tmurt: Ecsit ak idwem rewetc i wbrid, ujurt ajmmaḏ n sen ed tinim asen: Neccin d ismyan n wem. Rxxu egget ak idneγ ijj n rqarin!

9 12 Ayrum nney da tuγa ead ihḥma, umi t id ak idney ncsi zi tudrin nney d rewetc dg wass, arami id γarwem nṭṭef abrid. Rxxu maca, xzarttiwd awru: Iuzey ed itfruruy.

9 13 Ura ed iyccurn a n binu tuγa yen d imaynutn, umi ten ncur; ed rxxu, xzarttiwd awru: Ifdjqen. Ed da, ibartssutn ed tisira nney, ḥfan zg wbrid iggwjen.

9 14 Uca csin ait Israel zi rewetc; maca aqmmum n Arbbi war t ssqsin.

9 15 Ammu iwca asen Jusua rhudnet ed igga ak idsen ijj n rqarin, a ten ijj ddarn. Ura ed rmquddam n tmzyida (tmunett) jjudjen asen.

9 16 Krad n wussan maca, awarn i umi tuγa ak idsen ggin rqarin, sran nitni, aqqa iryazn tuγa zi radas ed zddyen dg wammas n tmurt n sen.

9 17 Ait Israel kkarn ujurn usind dg wass wiss 3 γar ibilajn n sen: γar Gibeun, Kefira, Beerut ed Kirjat-Jearim.

9 18 Maca ait Israel war bu wtin imzday, minzi rmquddam n tmzyida tuγa jjudjen asen γar Arbbi, Arbbi n Israel. Maca marra tamzyida (jjmaect, tmunett) t̄c̄den x rmquddam.

9 19 Uca nnan marra rmquddam i tmzyida: Neccin nijjudj asen γar Arbbi, Arbbi n Israel, x uyenni war nzm̄mar ad asen negg walu.

9 20 Neccin a t ak idsen negg ammu: Neccin a ten nejj ddarn, maḥend war id x afney iwṭṭi uxyyeq x tjadjit id asen ngga.

9 21 Rmquddam nnan asen: Nitni ad qqimen ddarn. Ammu ad tarzzan akcuḏ ad arbun aman i marra tamzyida, mamec id asen t nnan rmquddam.

9 22 X as uca irayad Jusua i ait Gibeun inna asen: Maimmi x afney tebarm tnam: Neccin nzddeγ γar rggwaj aṭṭas x afwem, waxxa kenniw tzddyem dg wammas n tmurt nney?

9 23 Rxxu kenniw ttwaxzam; kenniw a' tqqimem i rbda d ismyan, inni itarzzan akccuḍ ed inni iarbbun aman i taddart n Arbbi inu.

9 24 Nitni arrin x Jusua: I ismyan nneċ itwanna nican, min igga Jahwe, Arbbi nneċ, x ismeġ nnes Musa: Ad awem iwc marra tammurt ed ad ineġ jar tittawin n wem marra imzday n tmurt. S man aya neccin tuya nggwed zzaiwem aḥtas ed nggwed x tudart nney. X uyenni ngga neccin aya.

9 25 Rxxu aqqa aneġ dg wfus nneċ. Egg ak idneġ, min ttwarid issbeḥ ed nican.

9 26 Uca netta igga man aya: Netta issnjem i ten zg ait Israel, war ten bu nqnen;

9 27 maca netta iggi ten dg wass nni ad tarzzan akccuḍ ed ad arbbun aman i tmzyida ed i missa n Arbbi, mani ixs Arbbi. Aqqa qqimen ammu ġas ar iḍa.

10 1 Aduni-Zedek, ajdjid n Jerusalem, isra, aqqa Jusua tuya iṭṭef Ai iḡder i t- mameċ tuya t igga akd Jeriku ed ujdjid nnes, ammu iggi t ura akd Ai ed ujdjid nnes- ed aqqa imzday n Gibeun tuya ggin ak ait Israel rudnet ed zddġen dg wammas n sen.

10 2 Uca iggwed aḥtas; maġar Gibeun tuya d amqqran am ibilajn di itiri ujdjid; tuya d amqqran x Ai ad marra iryazn nnes tuya rmden amnġi.

10 3 Zi man aya issekk Aduni-Zedek, ajdjid n Jerusalem, imsxxarn ġar Huxam, ajdjid n Hebrun, ġar Biram, ajdjid n Jarmut, ġar Jafia, ajdjid n Laxic, ed ġar Debir, ajdjid n Eglun, iġja ad asen inin:

10 4 Gæedett-iwd ġari ed twcem ayi fus! Neccin nxs a' nwwet Gibeun, maġar igga ak Jusua ed ait Israel rhudnet.

10 5 Uca munen 5 n ijdjidn n ait Amurit gæeden s marra resakar n sen: ajdjid n Jerusalem, ajdjid n Hebrun, ajdjid n Jarmut, ajdjid n Laxic ed ujdjid n Eglun. Nitni unnuḍen i Gibeun kkarn tmnyan akd ubilaj.

10 6 X as uca sskken iryazn n Gibeun (imsxxarn) ġar Jusua dg wkwartir ġar Gilgal ad as inin: War smmeḥ dg ismyan nneċ! Γæedd dġya ġarneġ, snjem aneġ ed tasedd ewc aneġ fus; maġar marra ijdjidn n ait Amurit, izddġen di tmurt n idurar, munen tmeawanen x afneġ.

10 7 Uca iffeġ Jusua ak marra reskar, ak marra iryazn itwasrmden dg wmnġi, igæed zi Gilgal.

10 8 Arbbi inna i Jusua: War zzaisen tggwed; maġar a' ten ggeġ dg wfus nneċ. Ura ed iġjen zzaisen war id ac izmmar.

10 9 Awarn i umi Jusua tuya iujur tamddit tmun zi Gilgal, isur inṭeḥ daisen.

10 10 Arbbi issnxreċ i ten ġar tmzra n ait Israel, igga asen Jusua iġj n wġdar d amqqran ġar Gibeun. Netta iḍfar i ten x rgædett n Bet-Harun iarri ten ġas ar Aseka ed Mekkedda.

10 11 Umi nitni di tirwra zg ait Israel usind ġar tisi n Bet-Hurun, indar Arbbi x afsen izra d imqqranen zg wjenna, ġas ar Aseka, aḥtas zzaisen twanyen. Tuni itwanyen s izra, aḥtas x inni nġin ait Israel s usabli.

10 12 Dg wussan nni, umi igga Arbbi ait Amurit dg wfus n ait Israel, issiwer Jusua ak Arbbi; xenni inna netta jar ait Israel: Tfuct, bedd tiwa Gibeun ed cem, taziri, tiwa talat n Aġalun!-

10 13 Ed tfuct tqqim tbedd ed tziri tbedd tsqar ġas ar ami tuya ixref rgens zg isnga nnes. Aya iura dg jwadlis n Jacar“. Tfuct tbedd dg wammas n ujenna ed aġray nnes ieṭṭar, amni iġj n wass imun.

10 14 Awrud ura awarn as war immsar iġj n wass am wanita, di tuya isra Arbbi ġar tmijja n iġj n awd; Arbbi immneġ n Israel.

10 15 Awarn i uya ieqeb Jusua ed ak ids marra Israel dg wkwartir ġar Gilgal.

10 16 Smmus n ijdjidn maca tuya arwren tuya ffarn dg ifri ġar Makkeda.

10 17 Uca itwanna i Jusua: Neccin nufa 5 n ijdjidn, nitni nnuffarn dg ifri ġar Makkeda.

10 18 Jusua inna: Egget izra d imqqranen x uqmmum n ifri ed tsbdden iryazn zzats, ħima ad essen x ijdjidn.

10 19 Kenniw (inneġni) maca war tbdatt, maca ḍfart isnga ed tnyem ura ed min iqqimen! War ten tġjam ad awḍen ġas ar ibilajn n sen; maġar Arbbi, Arbbi n wem, igga awem ten dg wfus.

10 20 Ammu ggin asen Jusua ed ait Israel ict tcti d tamqqrant, tnyġ ten marra; ġar drus n imarwar njmen udfen dg ibilajn ifarjen.

10 21 Uca iarkkweḥ marra reskar iseḥḥ ġar Jusua ġar Makkeda ed ura ed iġjen war izeim ad issigwed ait Israel.

10 22 Xenni inna Jusua: Arzmet x ifri ed tawiemd 5 n ijdjidn zg ifri ġari da!

10 23 Nintni ggin t ssufyend 5 n ijdjidn zg ifri: ajdjid n Jerusalem, ajdjid n Hebrun, ajdjid n Jarmut, ajdjid n Laxic ed ujdjid n Eglun.

10 24 Umi tuya id iwien 5 n ijdjidn ġar Jusua, irayad Jusua i marra ait Israel inna i izdjifn n isrdas, inni tuya ak ids iffyen: Asttiwd awru, sarset i ijdjidn a ḍar n wem x iri! Nitni usind ssarsen asen ḍar x iri.

10 25 Ed Jusua inna asen: War tnxriet war tggwed! Irit d iryazn ed tmḥdem! Maġar ammu iya igg Arbbi ak isnga n wem, inni akd ġa tmmnyem.

10 26 Awarn as inya Jusua ijdjidn uca iġja ujren rxcbat ġar 5 n iskla. Dinni qqimen ġas ar ami d tamddit.

10 27 Ġar uydjay n tfuct issekk Jusua, a ten id kksen zg iskla a ten ndarn dg ifri, di tuya nnuuffarn. Xenni ggin tisudār d timqqrān in γa uqmmum n ifri; nitni mdden dinni γas ar iḏa.

10 28 Dg wass nni abēda iṭṭef Jusua Makkeda inya imzday nnes ed ujdjid nnes s usabli iqdeē. Netta iṭṭha t ed marra, min iddarn dg wbilaj; war iiji ura ed iij injem. Ak ujdjid n Makkeda igga, mamec tuya igga ak ujdjid n Jeriku.

10 29 Xenni iffey Jusua ak marra ait Israel zi Makkeda nac Libna.

10 30 Arbbi iwca ura ed Libna ed ujdjid nnes i ait Israel. Jusua inya marra, min dais iddarn, s usabli iqdeē; war iiji ura ed iij injem. Ak ujdjid nnes iggi t, mamec tuya i t igga ak ujdjid n Jeriku.

10 31 Xenni iffey Jusua ak marra Israel zi Libna γar Laxic iunuḏ i wbilaj uca iwḏa x afs.

10 32 Ed Arbbi igga ura ed Laxic dg wfus n Israel. Jusua iṭṭef abilaj dg wass wiss 2. Netta inya marra, min dais iddarn, s usabli iqdeā, ammu nican, mamec tuya i t igga ak Libna.

10 33 Umi Huram, ajdjid n Geser, iffeyd, ḥima ad iwch fus i Laxic, Jusua inyi t ura ed netta ed rgenes nnes ed war iiji ura ed iij, tuya izmmar ad injem.

10 34 Xenni iffey Jusua ak marra Israel zi Laxic γar Eglun. Nitni unnuḏen i wbilaj uca wḏan x afs.

10 35 Šad dg wass nni ṭṭfen abilaj nyin imzday nnes s usabli iqdeē. Marra, min dais iddarn, qḏan t ead dg wass nni, ammu nican, mamec tuya i t igga ak Laxic.

10 36 Zi Eglun igēed Jusua ak marra Israel γar Hebrun iwḏa x afs.

10 37 Nitni ṭṭfen abilaj ed nyin (ajdjid nnes ed) marra, min dais iddarn, ammu ura ed imzday n marra tibilajin yssis, s usabli iqdeē; war iiji ura ed iij injem, ammu nican, mamec tuya i t igga netta ak Eglun. Netta iqda abilaj ed marra, min dais iddarn.

10 38 Xenni idwer Jusua ak marra Israel γar Debir iwḏa x ubilaj.

10 39 Netta iṭṭef abilaj ed tibilajin nnes, iḥbbes ajdjid nnes, netta inya imzday nnes s usabli iqdeē iqda x marra, min dais iddarn; war iiji ura ed iij injem. Mamec tuya i t igga netta ak Hebrun ed Libna ed ujdjid nnes, ammu i t igga ura ak Debir ed ujdjid nnes.

10 40 Ammu iwta Jusua marra tammurt- tammurt n idurar ed Negeb, Cefala (azayar) ed rjwayeh nnes- s marra ijdjidn n sen. War iiji ura ed iij injem; marra, min iddarn, ingi t, mamec i t tuya igga Arbbi, Arbbi n Israel.

10 41 Jusua iṭṭef (marra tammurt) zi Kadec-Barnea γas ar Gaza ed ammu ura ed tammurt n Gučen ed tmurt γas ar Gibeun.

10 42 Marra ijdjidn a ed timura (timizar) n sen imneē i ten Jusua s ict tcti; mayar Arbbi, Arbbi n Israel, immney i Israel.

10 43 Xenni iēqeb Jusua ak marra Israel γar wkwartir γar Gilgal.

11 1 Umi Jabin, ajdjid n Hazur, isra aya, issekk imsxxarn γar Jubab, ajdjid n Madun, γar ujdjid n Cimrun, γar ujdjid n Axcaf

11 2 ed γar ijdjidn n nnej x idurar ed di Araba swadday n Kinneret, di Cifela ed x rgedett n Dur γar manis id tnqqar tfuct,

11 3 γar ait Kanaanit di manis id tnqqar tfuct ed mani tydji tfuct, γar ait Amurit, ait Hetit ed ait Berisit, γar ait Jebusit dg idurar ed ait Hewit γar wḏar n Hemun di tmurt Mizbe.

11 4 Uca ffyend s marra reskar n sen, iij n reskar d amqqrān dg waṭṭas am ijdi γar tma n ill, arni γars iij n qdda d amqqrān n iysan ed ikarrutn.

11 5 Marra ijdjidn a qarnen, usind wtin akwartir n sen munen γar waman n Merum, ḥima ad mmnyen akd Israel.

11 6 Arbbi inna i Jusua: War zzaisen tggwed! Mayar tiwcca ammu rxxu a' ten nyey marra a ten ggey i Israel γar iḏarn. Cēk a' tssfered iysan n sen a' tggēd ikarrutn n sen di tmssi.

11 7 Uca iffeyd Jusua s marra reskar-γar waman n Merum dyya iwḏa x afsen.

11 8 Arbbi iggi ten dg wfus n ait Israel ed ait Israel wtin ten ḏfarn ten γas ar Sidun- amqqrān ed Misrefut- Majim ed γas ar rwḏa n Mizbe di manis id tnqqar tfuct. Nitni qḏan ten, ura ed iijen war zzaisen iqqim, tuya izmmarn ad injem.

11 9 Jusua igga ak idsen, min tuya id as inna Arbbi: Netta issfcer iysan n sen ed igga igga ikarrutn n sen di tmssi.

11 10 Awarn as iēqeb Jusua iṭṭef Hazur; ajdjid nnes inyi t s usabli. Hazur tuya zic tiwa i marra tiglditin a.

11 11 Ait Israel nyin marra, min iddarn dg wbilaj, s usabli iqdeē. War jjin walu iddar. Abilaj simant nnes qqḏen as timssi.

11 12 Marra ibilaj n ijdjidn s marra ijdjidn n sen iḥwwes i ten Jusua; netta inya marra s usabli iqdeē ihttek i ten, mamec i t tuya inna Musa, ismeγ n Arbbi.

11 13 Marra ibilaj n, ibdden (γas ar iḏa) x tēurar, war id asen iqqiḏ Israel timssi; Hazur waha umi iqqeḏ Jusua timssi.

11 14 Marra agra zg ibilajn a ed rmar csin t ait Israel i ix f n sen, iwdan maca nyin ten marra s usabli iqdee qdan ten marra. Ura ed ijj war t jjin iddar.

11 15 Mamec tuya i t igga Arbbi x ismey nnes Musa, ammu tuya i t igga Musa x Jusua uca ammu issqfer i t Jusua! Netta war iiji walu zi marra, min tuya igga Arbbi x Musa.

11 16 Ammu ittef Jusua marra tammurt, idurar ed marra Negeb, marra tammurt n Gucem ed Cefela, Araba ed idurar n Israel ak Cefela nnes:

11 17 (Marra tammurt) zg idurar iqccura, inni igæden yar Scir, yas ar Baal-Gad dg iyzar n Libanun yar uðar n wdrar n Hermun. Marra ijdjidn n sen iħbbes i ten Jusua inyi ten.

11 18 Aṭṭas n wussan Jusua itmnya akd marra ijdjidn a.

11 19 War idji ura ed ijj n ubilaj, war tuya iggi rhudnet ak Israel, yar ait Hiwit, inni izdyen Gibeun. Marra twaṭṭfen dg wmn̄yi.

11 20 Maɣar Arbbi tuya igga, ad issqseħ ur n sen ar ami ffyen ad mmnyen akd Israel, ħima ad twanyen; Israel war isscin ħarsen bu aħinni, maca a ten qdan (kksen), mamec tuya i t igga Arbbi x Musa.

11 21 Dg wussan nni iffey Jusua ura yar ait Anakit, inni izdyen dg idurar, di Hebrun, di Debir, di Anab, di tmurt n idurar n Juda ed di tmurt n idurar n Israel; netta iqda ten marra s ibilajn n sen.

11 22 Di tmurt n ait Israel war qqimen ead ait Anakit; yar di Gaza, Gat ed Acdud i qqimen.

11 23 Jusua ittef marra tammurt, ammu nican, mamec tuya i t inna Arbbi i Musa, ed Jusua ibda t d taşyart i ait Israel x tqbbar. Xenni tuya amnyi ibedd ed tmurt tuya ħars rhudnet.

12 1 Ina d ijdjidn n tmurt, inni wtin ait Israel, ed tmura, i ṭṭfen, ayirin i Jurdan yar manis id tnqqar tfuct x talat n Arnun yas ar idurar n Hermun ak marra Araba di manis id tnqqar tfuct:

12 2 Sihun, ajdjid n Ait Amurit, wen tuya izdyen di Hecbun; netta tuya ħars zi Aruer yar ttarf n talat n Arnun ed zg wammas n talat ed wzyen n Gilead yas ar talat (tisdjya) n Jabbuk, iggin afraj yar ait Amunit,

12 3 ed Araba yas ar ajrmam n Kinneret di manis id tnqqar tfuct ed yas ar ill n Araba, ill amdjaħ di manis id tnqqar tfuct dg wbrid x Bet-Jecimut ed di Swadday x tmurt yar uðar (tisi) n wdrar Bisga,

12 4 xenni tammurt n Ug, ajdjid n Bacan, wen tuya iqqimen zg ait Rafait ed wen tuya izddyen di Actarut ed Edrei;

12 5 netta tuya t x idurar n Hermun ed Salxa ed marra Bacan yas ar tammurt n ait Gecurit ed ait Maaxatit ed x wzyen n Gilead yas ar tammurt n Sihun, ajdjid n Hecbun,

12 6 Musa, ismey n Arbbi, ed ait Israel tuya wtin ten ed Musa, ismey n Arbbi, tuya iwca tammurt i ait Rubenit, ait Gadit ed i wzyen n tqbite Manasse.

12 7 Ina d ijdjidn n tmurt, tuya wtin Jusua ed ait Israel ayirin i Jurdan mani tydji tfuct, zi Baal-Gad dg iyzar n Libanun yas ar idurar iqccura, igæden yar Scir- Jusua iwca tammurt n sen i tqbbar n Israel, x tarbiħin (ijmaeat) n sen;

12 8 dg idurar ed Cefela, di Araba ed yar tisi n idurar, di tnzruft ed di Negeb, (tammurt) n ait Hetit, ait Amurit, ait Kanaan, ait Berisit, ait Hewit ed ait Jebusit:

12 9 Ajdjid n Jeriku: ijjen; ajdjid n Ai, idjan yar uyzdis n Bet-El: ijjen;

12 10 ajdjid n Jerusalem: ijjen; ajdjid n Hebrun: ijjen;

12 11 ajdjid n Jarmut: ijjen; ajdjid n Lacix: ijjen;

12 12 ajdjid n Eglun: ijjen; ajdjid n Geser: ijjen;

12 13 ajdjid n Debir: ijjen; ajdjid n Geder: ijjen;

12 14 ajdjid n Hurma: ijjen; ajdjid n Arad: ijjen;

12 15 ajdjid n Libna: ijjen; ajdjid n Adullam: ijjen;

12 16 ajdjid n Makked: ijjen; ajdjid n Bet-El: ijjen;

12 17 ajdjid n Tabbuax: ijjen; ajdjid n Hefer: ijjen;

12 18 ajdjid n Afek: ijjen; ajdjid n Carun: ijjen;

12 19 ajdjid n Madun: ijjen; ajdjid n Hazur: ijjen;

12 20 ajdjid n Cimrun-Merun: ijjen; ajdjid n Axcalf: ijjen;

12 21 ajdjid n Taanax: ijjen; ajdjid n Megiddu: ijjen;.

12 22 ajdjid n Kedec: ijjen; ajdjid n Jukneam yar Karmel: ijjen;

12 23 ajdjid n Dur ajmmað i Dur: ijjen; ajdjid n Gujim di Galilea: ijjen;

12 24 ajdjid n Tirza: ijjen; marra munen: 31 n ijdjidn.

13 1 Umi tuya Jusua imyar d awssar, inna as Arbbi: cek twsard tmyarð di reumur, maca zi tmurt iqqim ead aṭṭas a t tawied.

13 2 Ta d tammurt iqqimen: Marra idwwarn n ait Filister ed marra tammurt n ait Gecurit

13 3 zg iyzar n Cihur manis id tnqqar tfuct x Egibt yas tammurt n Ekrun snnej- nettat n ait Kanaan-, 5 n rbacat n Filister n Gaza, Acdud, Ackelun, Gat ed Ekrun ed ait Awit

13 4 di swadday, marra tammurt n ait Kanaan ed Meara, tenni n Sidun, yas ar Afek ed yas ar tammurt n ait Amurit,

13 5 ed tmurt n ait Giblit ed marra Libanun manis id tnqqar tfuct, zi Baal-Gad yar uđar n wdrar n Hermun ƣas ar Lebu-Hamat.

13 6 Marra imzday n tmurt n wdrar zi Libanun ƣas ar Misrefut-Majim, marra ait Sidun a' ten xriy nnit zzat i ait Israel. Cek maca bđa tammurt jar Israel, mamec i t x afk ggiy.

13 7 Bđa rxxu tammurt a d tařyarat i 9 n tqbbar ed wzyen n tqbite n Manasse.

13 8 Azyen nneyni n tqbite n Manasse ed ak ids ait Rubenit ed ait Gadit tuya ttfen tařyarat n sen mrimi; tuya iwca asen tet Musa ayirin Jurdan di manis id tnqqar tfuct, (mamec tuya id asen tet iwca Musa, ismey n Arbbi),

13 9 zi Aruer ƣar tina n talat n Arnun ed zg wbilaj, idjan dg wammas n talat, marra rwđa n Medeba ƣas ar Dibun,

13 10 marra ibilajn n ujdjid n ait Amurit Sihun, wen idjan x Hecebun, ƣas ar tammurt n ait Ammunit,

13 11 arni ƣars Gilead ed tmurt n ait Gezurit ed ait Maxatit ed marra idurar n Hermun ed marra Bacan ƣas ar Salxa,

13 12 marra tagldit n Ug di Bacan, wen idjan x Actarut ed Edrei. Netta tuya iqqim zg ait Rafait. Musa tuya iwti ten iuzzer x afsen.

13 13 Maca ait Israel war uzziren x ait Gezurit ed ait Maaxatit; ammu zdyen ait Gezurit ed ait Maaxatit ƣas ar ida jar Israel.

13 14 I tqbite n Lewi war iwci Jusua tařyarat; Arbbi, Arbbi n Israel, d tařyarat nnes, mamec tuya id as 't inna Arbbi.

13 15 Bttu i tqbite n ait Rubenit tuya Musa iggi t x rwacunat n sen.

13 16 I nitni tuya tkkar asend tammurt n Aruer ƣar tma n talat n Arnun ed zg wbilaj, idjan dg wammas n talat: marra rwđa ƣar Medeba,

13 17 Hecebun ed marra ibilajn nnes di rwđa, Dibun, Bamut-Baal ed Bet-Baal-Meun,

13 18 Jahaz, Kedemut ed Mefaat,

13 19 Kirjatayim, Sibma ed Zeret-Cahar x wdrar di talat,

13 20 Bet-Begur, idmrawn n Bisga, Bet-Jecemut

13 21 ed marra ibilajn n rwđa, ix ad iini: marra tagldit n ujdjid n ait Amurit Sihun, wen idjan x Hecebun. Musa tuya iwti t netta ed rbacat n Midian: Ewi, Rekem, Zur, Hur ed Reba, izdjifn n reskar n Sihun, izdyen di tmurt nni.

13 22 Ura ed agzzan n Bileam, mmis n Beur, tuya nyin t ait Israel ak inneyni s usabli.

13 23 Afraj (rđedd) n ait Rubenit d Jurdan ed tmurt n tma nnes. Tammurt a s ibilajn nnes d tařyarat n ait Rubenit, x rwacunat n sen.

13 24 Musa tuya eawed iwca tařyarat i tqbite n Gad, ait Gadit, x rwacunat n sen.

13 25 I nitni tuya tkkar asend tmurt n Jaser ed marra ibilajn n Gilead, azyen n tmurt n ait Ammunit ƣas ar Aruer, idjan ajmmađ n Rabba,

13 26 (tammurt) n Hecebun ƣas ar Ramat-Mizbe ed Betunim ed zi Mahanayim ƣas ar tammurt n Lu-Dabar,

13 27 arni ƣars di talat Bet-Haram, Bet-Nimra, Sukkut ed Zafun- min iqqimen n tgldit n Sihun, ajdjid n Hecebun-, ed Jurdan ed tmurt ƣas ar ttarf n ugrmam n Kinneret ayirin i Jurdan di manis id tnqqar tfuct.

13 28 Tammurt a s ibilajn nnes ed granxat (tudrin n ifdjađn) d tařyarat n ait Gadit, x rwacunat n sen.

13 29 Musa tuya eawed iwca tařyarat i wzyen n tqbite n Manasse, (i wzyen n tqbite n Manasse tkkar as 'd třyarat) x rwacunat nnes.

13 30 Tammurt nnes zi Manhayim ƣar wfraj (rđedd) n Bacan, marra tagldit n ujdjid Ug zi Bacan ed marra rdcur n iqyđan n Jair di Bacan, 60 n ibilajn.

13 31 Azyen n Gilead ed Actarut ed Edrei, ibilajn n ujdjid n Ug zi Bacan, kkarn d i wara n Macir, mmis n Manasse, azyen n ait Macirit x (ela řsab) rwacunat n sen.

13 32 Ta d tammurt, dg wazayar n Muab ayirin i Jurdan manis id tnqqar tfuct x Jeriku tuya ibđa Musa d tařyarat.

13 33 I tqbite n Lewi maca war tuya id as ibđi Musa bu tařyarat. Arbbi, Arbbi n Israel, d tařyarat nnes, mamec tuya id asen t inna.

14 1 Tina d timura, i ttfen ait Israel di tmurt n Kanaan ed ibđan axhan Eleasar ed Jusua, mmis n Nun, ed izdjifn n rwacunat n ait Israel-

14 2 zg idjen (zi zžhar) bđan asen tet, mamec tuya i t igga Arbbi zi Musa-, i 9 n tqbbar ed wzyen.

14 3 Maƣar Musa tuya iwca i 2 n tqbbar ed wzyen tařyarat n sen mrimi ayirin i Jurdan; i ait Lewit war iwci bu tařyarat jar asen.

14 4 Mara ara n Jusef ggin 2 n tqbbar, Manasse ed Efraim. I ait Lewit war immwe bu tařyarat n tmurt, maca ƣar ibilajn waha d tazddiyt ed min idjan zzatsen n ddmani n tarwsa i rmar, ƣarsen idjan.

14 5 Mamec tuya i t igga Arbbi x Musa, ammu ggin t ait Israel uca bđan tammurt.

14 6 Dg wussan nni usind ait Judea di Gilgal γar Jusua ed Kaleb, mmis n Kenasit Jefunne, inna as: Cek tssned, min inna Arbbi i Musa, atarras n Arbbi, di Kadec-Barnea x afi ed x afk.

14 7 Necc tuya γari 40 n isggwasn, umi id ayi issekk Musa, ismey n Arbbi, di Kadec-Barnea, maħend ad xzary tammurt, ed necc eqbey γars ħajiy as min tuya idjan dg wur inu.

14 8 Xwansu aytma, inni tuya ak idi iffyen, ggin amnus di rgens, necc đfary Arbbi, Arbbi inu.

14 9 Dg wass nni ijjudj Musa: Tammurt, di tssarsed đar nnece, a' tiri i cek ed iħnjirn nnece d tašyart i rbdā, minzi cek tđfarđ Arbbi, Arbbi nnece.

14 10 Rxxu xzard awru: Arbbi ija ayi, mamec t ieahed, ddary. Rxxu 45 n isggwasn, zg wami issiwer Arbbi γar Musa awar a, umi Israel iujur di tnzruft. Ass a, mamec ttwarid, γari 85 n isggwasn.

14 11 Necc ead mħdey am wachar uya, umi id ayi issekk Musa; mamec tuya tadusi (tizmmar) inu dg wussan nni, ammu i tđja ead ass a (ida), mara tettugard, ad ffycy γar umny i ad arkkwħey.

14 12 Rxxu ewc ayi tammurt a n wdrar, zi issiwer Arbbi dg wass nni. Mayar cek tsrid simant nnece dg wass nni, aqqa ait Anakit dinni ed ibilajn d imqqrānen farjen (qwwarn). Waqira Arbbi aqqa t ak idi, a' x afsen azzrey, mamec inna Arbbi.

14 13 Uca igga Jusua ttisir di Kaleb, mmis n Jefunne, iwca as Hebrun d tašyart.

14 14 X uyenni Hebrun n Kenasit Kaleb, mmis n Jefunne γas ar ass a, minzi netta idfar Arbbi, Arbbi n Israel.

14 15 Hebrun tuya qqarn as zic Kiryat-Arba (abilaj n Arba); Arba tuya d aryaz amqqrān dg ait Anakit. Awarn as (awarn i uya) tuya iqda umny i ed tmurt tuya γars rhudnet.

15 1 I tqbite n ait Judea immwece s zzhār x rwacunat nnes, tašyart ajmmad n wfraj n Edum, swadday i tnzruft n zin, idjan swadday qaε.

15 2 Afraj (rħedd) n wadday n Juda ikumasa zg ill amdjaħ, γar irs n (ill), iswizzden γar swadday,

15 3 iædu xenni swadday γar rgedett n iyardmiwn, tjbēd din γar zin, tgeæed zi swadday zi Kadec-Barnea snnej, tndeh γar Hezrun, tgeæed snnej γar Addar ed teqeb γar Karka;

15 4 xenni tzkkwa γar Azmun, tffey γar ttarf n ugrmam n Egibt iggur γar ill. Wa d afraj n wadday n tqbite n Juda.

15 5 Afraj γar manis id tnqqr tfuct d ill amdjaħ γas ar ufuy n Jurdan. I wyzdis n nnej itkumasa wfraj γar irs n ill γar ufuy n Jurdan.

15 6 Afraj itffey xenni γar Bet-Hugla snnej ed itekk snnej x Bet-Araba. Xenni itggeæed γar wzru n Buhan, mmis n Ruben.

15 7 Zi Axural itggeæed γar Debir iteaqqab γar Gelilut ajmmađ i rgedett n Adummim, idjan swadday i talat n ugrmam; xenni inddeh din γar wamam n Encemec ed iæddu itffey γar tara n Rugel.

15 8 Zi ssa itggeæed wfraj snnej di talat n Ben-Hinnum swadday i wærun n wdrar n ait Jebusit-Jerusalem- ed iarni snnej γar tqicci n wdrar, idjan γar mani tydji tfuct x talat n Hinnum γar ttarf n nnej n wazyar n ait Rafait.

15 9 Zi tqicci n wdrar ifarrey wfraj γar tara n Neftuax ed tssufuy γar wdrar Efrun. Xenni ifarrey γar Baala, Kirjat-Jearim.

15 10 Zi Baala iteaqqab wfraj γar mani tydji tfuct γar wdrar Seir, inddeh xenni γar uyzdis n nnej n wdrar n Jearim, Kesalun, iæddu ihkkwa γar Bet-Cemec ed γar Timna.

15 11 Xenni itffey γar uyzdis n nnej n Ekrun, ifarrey γar Cikkarun, itraħ din γar wdrar Baala ed γar barra γar Jabneel. Afraj itffey γar ill.

15 12 Ill amqqrān ed tma n tmurt tggen afraj n mani tydji tfuct. Da ta tammurt n ait Judea zi marra iyzdisa, x rwacunat n sen.

15 13 Kaleb maca, mmis n Jefunne, iwca as Jusua ict tšyart jar ait Judea, x ttwsiiyyet n Arbbi i Jusua (Kiryat-Arba)- Arba tuya d babas n Anak-, ix s ad iini Hebrun.

15 14 Kaleb iuzzer ssni x 3 Anakit Cecai, Ahiman ed Talmai, tarwa (iħnjirn) n Anak.

15 15 Zi ssni igæed γar imzday n Debir. Debir tuya qqarn as zic Kiryat-Sefer.

15 16 Ed Kaleb inna: Man wen γa iarnan Kiryat-Sefer a t ittef, ad as wecy ydji Axxa d tamγart.

15 17 Ut Niel, mmis n Kena, iij n umas n Kaleb, ittef abilaj ed Kaleb iwca as ydjis Axxa d tamγart.

15 18 Umi nettat tusedd γar Ut Niel, iħsar i t, a' tarzu γar babas tammurt. Uca thwa x wyγur ed Kaleb issqsa t: Min γarm? (min cem iuyin)

15 19 Nettat tarra x afs: Ewc ayi ict tarzeft d jjurit n ttisir (rbaraka)! Mara cek tsskked ayi di tmurt n razay, xenni ewc ayi ura ed mani đjan waman! Uca iwca as tara idjan snnej ed tara idjan swadday.

15 20 Ta d tašyart n tqbite n ait Judea, x (ela ħsab) rwacunat nnes.

15 21 Ibilajn idjan γar ait Judea tuya: γar wfraj x Edum di Negeb: Kabzeel, Eder, Jagur,

15 22 Kina, Dimuna, Adada,

15 23 Kadec, Hazur, Jitna,

15 24 Sif, Telem, Bealut,

15 25 Hazur-Hadatta, Keriyyut-Hezrun, wa (ta) d Hazur,  
15 26 Amam, Cema, Mulada,  
15 27 Hazar-Gadda, Hecmun, Bet-Belet,  
15 28 Hazar-Cual, Beerceba ed tibilajin nnes,  
15 29 Baala, Ijim, Ezem,  
15 30 Eltulad, Kesil, Hurma,  
15 31 Ziklag, Madmanna, Sansanna,  
15 32 Lebaut, Cilhim ed En-Rimmun: Marra qae 29 n ibilajn s rđcur n sen;  
15 33 dg wazayar (Cefela): Ectaul, Zura, Acna,  
15 34 Sanuax, En-Gannim, Tabbuax, Enajim,  
15 35 Jarmut, Adullam, Suxu, Aseka,  
15 36 Caarajim, Aditajim, Gedera ed Gederutayim: 14 n ibilajn s rđcur n sen;  
15 37 Zenan, Hadaca, Migdal-Gad,  
15 38 Dilan, Mizbe, Jukteel,  
15 39 Laxic, Buzkat, Eglun,  
15 40 Kabbun, Laxmas, Kitlic,  
15 41 Gederut, Bet-Dagun, Naama ed Makkeda: 16 n ibilajn s rđcur n sen;  
15 42 Libna, Eter, Acan,  
15 43 Jiftax, Acna, Nezib,  
15 44 Keila, Axsib ed Mareca: 9 n ibilajn s rđcur n sen;  
15 45 Ekrun s tibilajin nnes ed rđcur n sen,  
15 46 zi Ekrun ȳas ar ill marra, min idjan ȳar uȳzdis n Acdud, s marra rđcur nnes;  
15 47 Acdud s tibilajin nnes ed rđcur, Gaza s tibilajin nnes ed rđcur ȳas ar agrmam afraj n Egibt ed  
ȳar ill amqqran ak tmurt n tma;  
15 48 x idurar: Camir, Jattir, Suxu,  
15 49 Danna, Kiryat-Sanna, wa (ta) d Debir,  
15 50 Anab, Ectemua, Anim,  
15 51 Guccn, Hulun ed Gilu: 11 n ibilajn s rđcur n sen;  
15 52 Arab, Duma, Ecan,  
15 53 Janum, Bet-Tabbuax, Afeka,  
15 54 Humta, Kiryat-Arba, wa d Hebrun, ed Ziur: 9 n ibilajn s rđcur n sen;  
15 55 Maun, Karmel, Sif, Jutta,  
15 56 Jesreel, Jukdeam, Sanuax,  
15 57 Kaim, Gibeal ed Timna: 10 n ibilajn s rđcur n sen;  
15 58 Halhul, Bet-Zur, Gedur,  
15 59 Maarat, Bet-Anut ed Eltekun: 6 n ibilajn s rđcur n sen; Tekua, Efrata, wa d Betlehem, Begur,  
Etam, Kulun, Tatam, Curec, Kerem, Gallim, Bet-Ter ed Manuxu: 11 n ibilajn s rđcur n sen;  
15 60 Kiryat-Baal wa d Kiryat-Jearim, ed Rabba: 2 n ibilajn s rđcur n sen;  
15 61 dg wazayar: Bet-Araba, Middin, Sexaxa,  
15 62 Nibcan, Ir-Melax ed En-Gedi: 6 n ibilajn s rđcur n sen.  
15 63 ȴar ait Jebusit, izdyen di Jerusalem, war zmmarn ait Judea a' x afsen azzren ammu zddyen ait  
Jebusit ȳas ar ida ak ait Judea di Jerusalem.  
16 1 Ta tuȳa d taȳart, id ikkarn i wara n Jusef s zzhar: (Afrac nnes) zi Jurdan ȳar Jeriku ȳar tarawin  
n Jeriku manis id tnqqar tfuct, xenni zi Jeriku itgēead di tnzruft ed dg idurar n Bet-El.  
16 2 Zi Bet-El itffey ȳar Lus barra ed ajmmadin ȳar tmurt n ait Arkit ȳar Atarut.  
16 3 Xenni inddeh ȳar swadday ȳar mani tydji tfuct ȳar tmurt n ait Jafletit ȳas ar tammurt n Adu-Bet-  
Hurun ed Geser ed itffey ȳar ill.  
16 4 Taȳart tffn tet ura ed ihnjirn n Jusef, Manasse ed Efraim.  
16 5 Ta tuȳa d tammurt n ait Efraimit, x rwacunat n sen: Afrac n tȳart n sen (di manis id tnqqar  
tfuct) iujur zi Atarut-Adar ȳas ar Tiwa-Bet-Hurun  
16 6 iggur ȳar ill. Zi Mixmetat di snnej iseqeb wfraj itekk manis id tnqqar tfuct ȳar Taanat-Cilu ieddu  
manis id tnqqar tfuct ȳar Januax.  
16 7 Zi Yanuax ishkkwa ȳar Atarut ed Naara, ithada Jeriku itffey ȳar Jurdan.  
16 8 Zi Tabbuax ieddu wfraj mani tydji tfuct ȳar ugrman n Kana itffey ȳar ill. Ta d taȳart n ait  
Efraimit, x rwacunat n sen;  
16 9 ed (ikkard) i ait Efraimit ibilajn jar tȳart n ait Manassit, ibilajn s marra rđcur n sen.  
16 10 Ait Efraimit war zmmarn maca ad azzren x ait Kanaanit, izddyen di Geser. Ammu zddyen ait  
Kanaanit ȳas ar ida dg wammas n Efraim; dwren maca d ismȳan i rxdmet iuearn.

- 17 1 I tqbite n Manasse- netta tuya d amnzu n Jusef- ikkar as 'd zi zzhar taşyart a: Maxir, amnzu n Manasse, babas n Gillead,- netta tuya idarreb dg wmanyi- imneċ Gillead ed Bacan.
- 17 2 Ura ed iħnjirn nneġni n Manasse mnċen (taşyart) x rwacunat n sen: iħnjirn n Abieser, iħnjirn n Helek, iħnjirn n Asriel, iħnjirn n Cexem, iħnjirn n Hefer ed iħnjirn n Cemida; ina d ara iwtman n Manasse, mmis Jusef, ak rwacunat n sen.
- 17 3 Zelufad maca, mmis n Hefer, mmis n Gillead, mmis n Maxir, mmis n Manasse, war tuya ġars bu iħnjirn, maca yssis waha. Yssis tuya ġarsent assaġn (ismawn) a: Maxla, Nua, Hugla, Milka ed Tirza.
- 17 4 Nitnti ffyent ġar uxhan Eleasar ed Jusua, mmis n Nun, ed ġar imqqrannen nnant: Arbbi igga x Musa, ad aneġ iwc taşyart jar aytmatneġ. Uca iwca asent, mamec igga Arbbi, taşyart jar tawmat n babatsent.
- 17 5 Ammu ikkard i Manasse, s tmurt n Gillead ed Bacan, 10 n tsqqar, idjan ayirin i Jurdan.
- 17 6 Maġar yssis n Manasse ttfent taşyart jar iħnjirn nnes. Tammurt n Gillead maca ttfen tet iħnjirn n Manasse iqqimen.
- 17 7 Tammurt n Manasse zi tmurt n Acer ġas ar Mixmitat, idjan ajmmaġ i Sixem. Zi ssni afraġ itffey ġar swadday ġas ar imzday n En-Tabbuax.
- 17 8 Manasse tdwer tmurt n Tabbuax ġars, Tabbuax simant nnes maca, ġar wfraġ n Manasse, tdwer i ait Efraimit.
- 17 9 Xenni ishkkwa wfraġ ġar ugrmam n Kana; swadday i wgrmam ibilajn idjan jar ibilajn n Manasse, n ait Efraim. Snnej i wgrmam idja wfraġ n Manasse; itffey ġar ill.
- 17 10 Tammurt idjan swadday n Efraim ed tmurt idjan snnej n Manasse, afraġ nnes d ill. Di snnej ttnħdda x Acer, di manis id tnqar tfuct x Issaxar.
- 17 11 Manasse ittef di Issaxar ed di Acer Bet-Cean ed tbilajin nnes, Jibleam ed tbilajin nnes, imzday n Dur ed tbilajin nnes, imzday n En-Dur ed tbilajin nnes, imzday n Taanax ed tbilajin nnes, imzday n Megiddu ed tbilajin nnes (3 n idwwarn).
- 17 12 Maca ait Manassit war zmmarn ad awien ibilajn a; ait Kanaanit mnċen tizdday n sen di tmurt a.
- 17 13 Umi maca ait Israelit tuya dwren jhden, ħsarn ten ġar rxdmet iuċarn; maca war zmmarn a' x afsen azzren.
- 17 14 Ara n Jusef nnan i Jusua: Maimmi id aneġ twcid ġar ijj n zzhar waha ed ict tşyart waha, waxxa neccin d ijj n rġens d amqqrان, awarn i umi daineġ igga Arbbi aħtas n ttisir?
- 17 15 Jusua iarra x afsen: Mara kenniw d rġens d amqqrان, xenni ġeċdet ġar tmurt n tagant ed tggem i ixf n wem dinni di tmurt n ait Berisit ed ait Rafait, mara iħsarn x afwem idurar n Efraim,
- 17 16 Uca nnan ait Jusef: Tammurt n wdrar war id aneġ tqiddi. Di tmurt n rwġa maca zddyen ait Kanaanit, inni marra ġar djan ikarrutn n umnyġ n wuzzar, am iwdan di Bet-Cean ed tbilajin nnes ed iwdan di rwġa n Jesreel.
- 17 17 Jusua inna i taddart n Jusef, Efraim ed Manasse: Kenniw d ijj n rġens d amqqrان ed ġarwem tadusi d tamqqrان. Kenniw war dji tettfen ġar ict tşyart waha;
- 17 18 maġar ura ed tammurt n wdrar a' tiri n wem. Aqqa d tagant; kenniw tzmmarm a t tarzem. Tammurt zzais ġa tggem n wem, mara ait Kanaanit ġarsen ikarrutn n umnyġ n wuzzar a' ten txram.
- 18 1 Marra tmunett (tamzyida) n ait Israelit tmun di Cilu. Dinni wtin taqyġunt (taxzant) tamrabtt (tamqddest); marra tammurt twġa ġar idarn n sen.
- 18 2 Marra tuya ead qqiment zg ait Israelit 7 n tqbbar, tinni tuya war imniċen taşyart n sent.
- 18 3 Uca inna Jusua i ait Israelit: Min ttrajam ead, a' din tujurm a' tettfem tammurt, id awem iwca Arbbi, Arbbi n ibabatn n wem?
- 18 4 Arcħet 3 n iryazn zi tqbite; necc a' ten sskkeġ. Nitni ad ttfen abrid, ad ujurn di tmurt a t arin x tşyart n sen. Xenni ad ġari eqben.
- 18 5 Kenniw a t tbġam x 7 tsqqar. Juda ad iqqim x tmurt nnes di Swadday ed taddart n Jusef a' tqqm x tmurt nnes di sennej.
- 18 6 Kenniw a' tarim (a' tzmmem) tammurt di 7 n tsqqar ad ayi 'd tawiem (blan) danita. Necc ad awem da ggeġ (ndary) zzhar zzat i Arbbi, Arbbi nneġ.
- 18 7 Maca Lewi war itettef taşyart jar awem, maġar taşyart nnes d taxhanect n Arbbi. Ed Gad, Ruben ed wzyen n tqbite n Manasse ttfen mrmġ taşyart n sen; iwca asen tet Musa, ismeġ n Arbbi, ayirin i Jurdan di manis id tnqar tfuct.
- 18 8 Uca ttfen iryazn abrid ujurn. Jusua tuya igga x inni, iffyeġ ujurn, ad zmmemen tammurt s tira, inna: ujurt, ffyeġ ġar tmurt ed tarim tmmurt! Xenni eqbettiwd ġari ed necc ad awem da ggeġ zzhar di Cilu zzat i Arbbi.
- 18 9 Iryazn ujurn, cuqen tammurt urin tet dg ijj wadlis, abilaj abilaj ed x 7 n irqiċen. Xenni usind eawed ġar Jusua dg wkwartir ġar Cilu.
- 18 10 Ed Jusua igga zzhar (tazrut) di Cilu zzat i tittawin n Arbbi i ait Israelit. Ammu ibġa asen Jusua tammurt, x tarbiħin n sen.

18 11 Zzhar (amzwaru) iwḏa x tqbitc n Benyamin ed rwacunat nnes. Taşyart n sen tusedd jar ait Judea ed wara n Jusef.

18 12 Afraj nnes di snnej itffey zi Jurdan. Xenni itgēead ɣar wērer n wdrar snnej i Jeriku iēddu ɣar mani tɣdji tfuct dg idurar itffey di tmurt n tarkkwast n Bet-Awen.

18 13 Zi snni tzkkwa ɣar Lus, swadday ɣar wērer n wdrar n Lus, wa d Bet-El; xenni itgēead ɣar Atrut-Addar snnej ɣar wdrar, idjan swadday n Adu-Bet-Hurun.

18 14 X as ifarrey iēddu x uyzdis mani tɣdji tfuct ɣar swadday, zg wdrar, idjan swadday ajmmaḏ n Bet-Hurun. Itffey ɣar Kiryat-Baal, wa d Kiryat-Jearim, ijj n ubilaj n ait Judea. Wa d ayzdis mani tɣdji tfuct.

18 15 Ayzdis n swadday (n afraj) itffey zi tṭarf n Kiryat-Jearim. Itekk xenni x mani tɣdji tfuct ɣar tara n Neftuax.

18 16 Xenni ishkkwa ɣar tṭarf n wdrar, idjan ajmmaḏ n talat n Hinnum di snnej n rwḏa n Rafait. Itgēead di talat n Hinnum swadday i wērer n wdrar n ait Jebusit inddeh ɣar tara n Rugel swadday.

18 17 Xennik ifarrey ɣar snnej, iēddu ɣar En-Cemec ed Gelilut, ajmmadin i rgedett n Adummim, itēead xenni ɣar wzru n Buhan, mmis n Ruben, swadday.

18 18 Itffey snnej ɣar wērer n wdrar n Bet-Araba ishkkwa di Araba.

18 19 Xenni inddeh wfraj snnej ɣar wērar n wdrar n Bet-Hugla itffey snnej i irs n tmurt n ill amdjaḥ, ɣar qṭtu n Jurdan swadday. Wa d afraj n swadday.

18 20 Jurdan itegg afraj x uyzdis manis id tnqqar tfuct. Ta d taşyart n ait Benyaminit s wfraj nnes id as iqwwarn, x rwacunat n sen.

18 21 Ina d ibilajn n tqbitc n ait Benyaminit, x rwacunat n sen: Jeriku, Bet-Hugla, Emek-Keziz,

18 22 Bet-Araba, Zemarayim, Bet-El,

18 23 Awim, Bara, Ufra,

18 24 Kefar-Ammuni, Ufni ed Geba: 12 n ibilajn s rḏcur n sen;

18 25 ed Gibeun, Rama, Beerut,

18 26 Mizbe, Kefira, Muza,

18 27 Rekem, Jirbeel, Tarala,

18 28 Zela, Elef, Jebus, wa d Jerusalem, Gibea ed Kiryat: 14 n ibilajn s rḏcur n sen. Ta d taşyart n ait Benyaminit, x rwacunat n sen.

19 1 Zzhar wiss 2 iwḏa (x Simun) x tqbitc n ait Simeunit ed rwacunat n sen. Taşyart n sen tɣja jar tşyart n ait Judea.

19 2 Nitni tṭfen taşyart: Beerceba, Cheba, Mulada,

19 3 Hazar-Cual, Baala, Ezem,

19 4 Eltulad, Betul, Hurma,

19 5 Ziklag, Bet-Markabut, Hazar-Susa,

19 6 Bet-Lebaut ed Caruhen: 13 n ibilajn s rḏcur n sen,

19 7 ed Ajin, Rimmun, Atar ed Acan: 4 n ibilajn s rḏcur n sen,

19 8 arni ɣars marra rḏcur iunnuḏen i ibilajn a ɣas ar Baalat-Beer ed Ramat-Negeb. Ta d taşyart n tqbitc n ait Simeunit, x rwacunat n sen.

19 9 Taşyart n ait Simeunit tuya d ijj tṭarf zi tşyart n ait Judea; maɣar taşyart n ait Judea tuya i ina d tamqqrant aṭṭas. Ammu tṭfen ait Simeunit taşyart dg wammas di tşyart n sen.

19 10 Zzhar wiss 3 iwḏa x ait Sebulunit ed rwacunat n sen. Tammurt n tşyart n sen tffey ɣas ar Sarid.

19 11 Afraj itgēead x mani tɣdji tfuct ɣar Marala, ithada Dabbecet itffey ɣar ugrman n talat ajmmaḏ n Jukneam.

19 12 Zi Sarid ifarrey manis id tnqqar tfuct (ɣar nnqran n tfuct) ɣar tmurt n Kislut-Tabur, iarni iggur ɣar Daberat ed snnej ɣar Jafia.

19 13 Zi ssnni iteaqqab x manis id tnqqar tfuct akd nnqran n tfuct ɣar Gat-Hefer ed Et-Kazin ed ɣar Rimmun ifarrey xenni ɣar Nea.

19 14 Itunnuḏ i Nea, iggur xenni jjihet n nnej ɣar Hannatun ed itffey di talat Jiftax-El.

19 15 (Arni ɣars) ... Kattat, Nahalal, Cimrun, Jidala ed Betlehem: 12 n ibilajn s rḏcur n sen.

19 16 Ta d taşyart n ait Sebulunit, x rwacunat n sen: ibilajn s rḏcur n sen.

19 17 Zzhar wiss 4 iwḏa (x Issaxar,) ait Issaxarit ed rwacunat n sen.

19 18 Tammurt n sen tffey ɣas ar Jesreel ed (teṭṭefd) Kesullut, Cunem,

19 19 Hafarayim, Ciun, Anahara,

19 20 Rabbit, Kicyun, Ebez,

19 21 Remet, En-Gannim, En-Hadda ed Bet-Bazzez.

19 22 Afraj ithada Tabur, Cahazayim ed Bet-Cemec. Xenni itffey ɣar Jurdan: Marra 16 n ibilajn s rḏcur n sen.

19 23 Ta d taşyart n ait Issaxarit, x rwacunat n sen: ibilajn s rđcur n sen.

19 24 Zzhar wiss 5 iwđa x tqbite n ait Acerit ed rwacunat n sen.

19 25 Tammurt n sen tettef Helkat, Hali, Beten, Axcaf,

19 26 Alammelex, Amad ed Mical; tteffey mani tydji tfuct yar Karmel ed yar iyzar Libnat.

19 27 Di manis id tnqqar tfuct iggur wfraj yar Bet-Dagun, itffey yar Sebulun ed itħada snnej talat Jiftax-El, ead ed Bet-Emek ed Negiel iggur xenni snnej yar Kabul-

19 28 Abdun, Rehub, Hammun ed Kana qqnen yars- ed yas ar Sidun- Amqgran.

19 29 Xenni ifarrey wfraj yar Rama iggur yas ar qastiiyu n Tiru. Zi ssni iteaqqab yar Husa itffey yar ill. (Arni yars) ... Mahaleb, Axsib,

19 30 Umma, Afek ed Rehub: (marra qae) 22 n ibilajn s rđcur n sen.

19 31 Ta d taşyart n tqbite n ait acerit, x rwacunat n sen: ibilajn s rđcur n sen.

19 32 Zzhar wiss 6 iwđa x Naftalit ed rwacunat nnes.

19 33 Afraj nnes ttraħ zi Helef, zi tbdjut yar Zaananim, itek x Adami-Nekeb ed Jabneel yas ar yar Lakkum itffey yar Jurdan.

19 34 S rmqrub iggur wfraj mani tydji tfuct yar Asnut-Tabur ed zi snni din barra yar Hukuk. Itffey swadday yar Sebulun; di mani tydji tfuct itffey yar Acer ed di manis id tnqqar tfuct (yar Juda ed) yar Jurdan.

19 35 (Arni yars) ibilajn ifarjen Ziddim, Zer, Hammat-Rakkat, Kinneret,

19 36 Adama, Rama, Hazur,

19 37 Kedec, Edreĭ, En-Hazur,

19 38 Jirun, Migdal-El, Hurem, Bet-Anat ed Bet-Cemec: 19 n ibilajn s rđcur n sen.

19 39 Ta d taşyart n ait Neftalit x rwacunat n sen: ibilajn s rđcur n sen.

19 40 Zzhar wiss 7 iwđa x tqbite n ait Danit ed rwacunat n sen.

19 41 Tammurt n tşyart n sen tettef Zura, Ectaul, Ir-Cemec,

19 42 Calbim, Ajalun, Jitla,

19 43 Elun, Timna, Ekrun,

19 44 Elteke, Gibbetun, Baalat,

19 45 Jehud, Bene-Berak, Gat-Rimmun,

19 46 Me-Jarkun, Rakkun marra tammurt qibate Jafu.

19 47 Maca tammurt idwer i ait Danit iħsar. Uca gæden ait Danit yar Lecem, arzmen amnyi akd Lecem, iwien t nyin imzday n sen s usabli iqđee. Nitni ttfen abilaj uca qqimen dinni. Nitni zi ssni ggĭn as i Lecem Dan, x wassay (isem) n babatsen amzwaru Dan.

19 48 Ta d taşyart n ait Danit, x rwacunat n sen: ibilajn s rđcur n sen.

19 49 Ammu qđan ait Israelit bttu n tmurt. Ait Israelit wein ura i Jusua, mmis n Nun, taşyart jar asen.

19 50 Mamec igga Arbbi wein as abilaj, tuya ittar: Timnat-Serax dg idurar n Efraim. Netta isbedd abilaj izdey dinni.

19 51 Tina d tisqqar, i bđan axhan Eleasar ed Jusua, mmis n Nun, ed imyarn (izdjifn) n twacunin timqgranin n ait Israelit di Cilu zzat i tittawin n Arbbi, yar wadaf n tqydunt tamqđdest, i tqbirin n ait Israelit zi (s) zzhar. Xenni tuya ten qđan (xyyren) bttu n tmurt.

20 1 Dg wussan nni inna Arbbi i Jusua:

20 2 Ini i ait Israelit: Ad farzen ibilajn n tarwra yarwem, i xf id yarwem ssiwrey zi Musa.

20 3 Ğar din izmmar qae, wen inyin, ixs ad iini, wen inyin iwd, nnhra ma ixs, nnhra min xf. Ibilajn ad irin i kenniw d mani ya tarwrem zg inni ya ixrfen ticti.

20 4 Mara ijjen iarwer yar ijj zg ibilajn a, x afs ad ibedd yar twwart n ubilaj ed ad iħaja tamsart nnes i iwssura n ubilaj. Nitni a t ssidfen dg wbilaj ad as wcen mani ya izdey, maħend a' yarsen iqqim.

20 5 Mara xenni idfar i t wenni yar ixrfen ticti, war id as tticcen wen, inyin; mayar netta inya wenni iudsen war dji nemada- ed nnhra ma tuya icarh i t.

20 6 Netta ad iqqim dg wbilaj a, yas ar id izmmar ad ias yar wjraw, yas ar tamnawt n uxhan amqgran, wen idjan dg wussan nni di txhanect. Xenni izmmar wenni, inyin, ad ieqeb dg wbilaj nnes ed taddart nnes- dg wbilaj, zi id iarwer.

20 7 Arcĥen Kadec di Galilea, dg idurar n Naftali, ed Sixem dg idurar Efraim ed Kiryat-Arba, wa d Hebrun, dg idurar n Juda.

20 8 Ayirin n Jurdan (manis id tnqqar tfuct x Jeriku) farzen Bezer dg wazayar, di rwđa, n tqbite Ruben, Ramut di Gilead zi tqbite Gad ed Gulan di Bacan zi tqbite Manasse.

20 9 Ina tuya d ibilajn n tarwra i marra ait Israelit ed rbarrani, inni yarsen iqqimen. Ğar din izmmar qae, wen tuya inyin iwd war dji nemada, ad iarwer, ĥima war itwaney zg wfus n wenni ya ixrfen ticti, awrud ad ibedd yar wjraw.

21 1 Izdjifn (imyarn) n twacunin n ait Lewit usind yar Cilu di tmurt n Kanaan yar uxhan Eleasar, yar Jusua, mmis n Nun, ed yar izdjifn n tqbite n ait Israelit

21 2 nnan asen: Arbbi igga x Musa, ad ancy iwc ibilajn i tzddiyt ed ddmanni n sen n tarwsa i rmar nney.

21 3 Uca wcin ait Israelit i ait Lewit x ttwsiyet n Arbbi zi tsyart n sen ibilajn a s ddmanni n sen n tarwsa.

21 4 Umi iwða zzharr x rwacunat n ait Kehatit, ttfen jar ait Lewit ara n uxhan Aarun zi zzharr 13 n ibilajn zi tqbitc n Juda, zi tqbitc n ait Simeunit ed zi tqbitc Benyamin.

21 5 Inni iqqimen n ait Kehatit ttfen, x rwacunat n sen, zi zzharr 10 n ibilajn zi tqbitc n Efraim, zi tqbitc Dan ed zg wzyen n tqbitc Manasse.

21 6 Ara n Gercun ttfen, x rwacunat n sen, zi zzharr 13 n ibilajn zi tqbitc n Issaxar, zi tqbitc n Acer, zi tqbitc n Naftali ed zg wzyen n tqbitc n Manasse di Bacan.

21 7 Ara n Merari ttfen, x rwacunat n sen, 12 n ibilajn zi tqbitc Ruben, zi tqbitc Gad ed zi tqbitc Sebulun.

21 8 Ibilajn a s ddmanni n sen n tarwsa wcin ten ait Israelit zi zzharr i ait Lewit, mamec tuya i t igga Arbbi zi Musa.

21 9 Zi tqbitc n ait Juda ed zi tqbitc n ait Simeunit wcin asen assayn (ismawn) n ibilajn.

21 10 Mmwccen i wara n Aarun jar ait Kehatit, jar ait Lewit; mayar x afsen iwða zzharr amzwaru.

21 11 I nitni immwc ubilaj n Arba, babas n Anak, Hebrun, dg idurar n Juda, s ddmanni nnes n tarwsa id as iunnuđen.

21 12 Ijjarn n ubilaj maca ed rdcur nnes tuya mmwccen i Kaleb, mmis n Jefunne.

21 13 I wara n uxhan Aarun immwc ubilaj n tarwra i in, inyin ijj iwd, Hebrun ak ddmanni nnes n tarwsa, ed Libna ak ddmanni nnes n tarwsa,

21 14 Jattir ak ddmanni nnes n tarwsa, Ectemua ak ddmanni nnes n tarwsa,

21 15 Hulun ak ddmanni nnes n tarwsa, Debir ak ddmanni nnes n tarwsa,

21 16 Ajin ak ddmanni nnes n tarwsa, Jutta ak ddmanni nnes n tarwsa ed Bet-Cemec ak ddmanni nnes n tarwsa; 9 n ibilajn zi 2 n tqbbar (tiqbirin) (ait Juda ed ait Simeunit).

21 17 Zi tqbitc n Benyamin (wcin asen) Gibeun ak ddmanni nnes n tarwsa, Geba ak ddmanni nnes n tarwsa,

21 18 Anatut ak ddmanni nnes n tarwsa ed Alemet ak ddmanni nnes n tarwsa: 4 n ibilajn.

21 19 Marra ttfen ait Aarun, tuya idjan d ixhanen, 13 n ibilajn s ddmanni n sen n tarwsa.

21 20 Rwacunat n ait Kehatit llewitn, inni zg wara n Kehat tuya iqqimen, ttfen ibilajn n tsyart n sen zi tqbitc n Efraim.

21 21 Wcin asen ibilajn n tarwra i in, inyin ijj n iwd, Sixem s ddmanni nnes n tarwsa dg idurar n Efraim, ed Geser s ddmanni nnes n tarwsa,

21 22 Kibzayim ak ddmanni nnes n tarwsa ed Bet-Hurun ak ddmanni nnes n tarwsa (tarkwsa): 4 n ibilajn;

21 23 zi tqbitc n Dan ttfen nitni Etteke s ddmanni nnes n tarwsa, Gibbetun s ddmanni nnes n tarwsa,

21 24 Ajalun ak ddmanni nnes n tarwsa ed Gat-Rimmun ak ddmanni nnes n tarwsa: 4 n ibilajn;

21 25 zg wzyen n tqbitc n Manasse ttfen Taanax ak ddmanni nnes n tarwsa ed Gat-Rimmun ak ddmanni nnes n tarwsa: 2 n ibilajn.

21 26 Marra qaε ttfen rwacunat n in iqqimen zg wara n Kehat 10 n ibilajn.

21 27 I ait Gercunit zi rwacunat n ilewitn wcin zg wzyen n tqbitc n Manasse abilaj n tarwra i in, inyin ijj n iwd, Gulan di Bacan s ddmanni nnes n tarwsa ed Actarut ak ddmanni nnes n tarwsa: 2 n ibilajn;

21 28 zi tqbitc Issaxar ttfen nitni Kicyun ak ddmanni nnes n tarwsa, Daberat ak ddmanni nnes n tarwsa,

21 29 Jarmut ak ddmanni nnes n tarwsa ed En-Gannim ak ddmanni nnes n tarwsa: 4 n ibilajn;

21 30 zi tqbitc Acer ttfen nitni Mical s ddmanni nnes n tarwsa, Abdun s ddmanni nnes n tarwsa,

21 31 Helkat ak ddmanni nnes n tarwsa ed Rehub ak ddmanni nnes n tarwsa: 4 n ibilajn;

21 32 zi tqbitc Naftali ttfen nitni abilaj n tarwra i in, inyin ijj n iwd, Kedec di Galilea ak ddmanni nnes n tarwsa ed Hammut-Dur ak ddmanni nnes n tarwsa ed Kartan ak ddmanni nnes n tarwsa: 3 n ibilajn.

21 33 Marra qaε ttfen ait Gercunit, x rwacunat n sen, 13 n ibilajn s ddmanni n sen n tarwsa.

21 34 I inni iqqimen n ait Lewit, rwacunat n wara n Merari, wcin zi tqbitc n Sebulun Jukneam ak ddmanni nnes n tarwsa, Karta ak ddmanni nnes n tarwsa,

21 35 Dimna ak ddmanni nnes n tarwsa ed Nahalal ak ddmanni nnes n tarwsa: 4 n ibilajn;

21 36 arni yars zi tqbitc n Ruben Bezer ak ddmanni nnes n tarwsa, Jahaz ak ddmanni nnes n tarwsa,

21 37 Kedemut ak ddmanni nnes n tarwsa ed Mefaat ak ddmanni nnes n tarwsa: 4 n ibilajn;

21 38 zi tqbitc n Gad ttfen nitni abilaj n tarwra i in, inyin ijj n iwd, Ramut-Gilead ak ddmanni nnes n tarwsa, ed Mahanayim ak ddmanni nnes n tarwsa,

21 39 Hecbun ak ddmanni nnes n tarwsa ed Jaser ak ddmanni nnes n tarwsa: marra 4 n ibilajn.

21 40 Marra qaε ttfen ait Merarit x rwacunat n sen, inni tuya iqqimen ead jar rwacunat n ait Lewit, taşyart n sen 12 n ibilajn.

21 41 Marra qdda n ibilajn n Iliwitn di tşyart n ait Israelit 48, ak dđmani n sen n tarwsa.

21 42 Ibilajn a marra ęarsen dđmani n tarwsa di tmurt n sen; ammu i tuęa tdja ęar marra ibilajn.

21 43 Ammu iwca Arbbi i Israel marra tammurt, tuęa igga s reahed ak imzwura n sen. Nitni iwien tet qqimen zdęen dais.

21 44 Ed Arbbi igga asen rhudnet zi marra ięzdisa, nican ammu mamec tuęa i t igga ak imzwura n sen s reahed. Ura ed ijjen zg isnga n sen war id asen izmmar; marra isnga n sen igga asen ten dg wfus.

21 45 Ura ed ijj n reahed, iwca Arbbi i Israel, tuęa war iqqim; qae qfren.

22 1 Dg wussan nni irayad Jusua i ait Rubenit, ait Gadit ed wzyen n tqbitc n Manasse ęars

22 2 inna asen: Kenniw tđfarm marra, min id awem inna Musa, ismey n Arbbi; kenniw tsram ęar marra, min id awem nnię.

22 3 Kenniw war tsmihem dg aytmatwem dg waęas a n wussan ęas ar ass a (iđa) ed thđam, tđfarm awssi n Arbbi, Arbbi n wem.

22 4 Rxxu igga Arbbi, Arbbi n wem, i aytmatwem rhudnet, mamec tuęa id asen tet ieahed. Sębet eawed ęar tqyđunin (txuzan) n wem, di tmurt, id awem iwca Musa, ismey n Arbbi, ayirin n Jurdan.

22 5 Hđat maca mlię, a' tssqfrem arqqas ed wbrid, id awem iwca Musa, ismey n Arbbi: A' ttxsem Arbbi n wem, a' tujurm di marra ibridn nnes, a' tđfarm irqqasn nnes, a t tarđdfem ed ad as txmmsem s marra ur ed marra buęber.

22 6 Xenni igga daisen Jusua ttisir (tfawt, rbaraka) ijj ten ujurn ed nitni arxwęen ęar txuzan n sen.

22 7 I ijj n wzyen n tqbitc n Manasse tuęa iwca Musa di Bacan (tmmurt), i ijj n wzyen nneęni iwca as Jusua ęar ayt matsen (tammurt) x uęzdis nneęni n Jurdan di mani tđđi tfuct. Umi Jusua ijj ten ujurn eawed ęar txuzan n sen igga daisen ttisir,

22 8 inna asen netta: S wagra d amqqran a' teqbem ęar txuzan n wem, s waęas n rmar, s nnuqart ed wury, s nnęas, uzzar ed s waęas n waruđ. Bđat zzardet, id tkksem i isnga n wem, ak aytmatwem.

22 9 Ammu jjin ait Rubenit, ait Gadit ed wzyen n tqbitc n Manasse ait Israelit ujurn zi Cilu di tmurt Kanaan ęar Gilead, di tmurt, nni n sen tuęa tđfen zg wđbbar n Arbbi zi Musa.

22 10 Umi nitni iwđen ęar tqwirin n izra ęar Jurdan, idjan ead di tmurt n Kanaan, sbdden ait Rubenit, ait Gadit ed wzyen n tqbitc n Manasse dinni ęar Jurdan missa (Altar) tewwar aęas.

22 11 Uca mnęen ait Israelit ijj n warqqas: Xzart, ait Rubenit, ait Gadit ed wzyen n tqbitc n Manasse sbdden ajmmađ i tmurt n Kanaan ęar tqwirin n izra ęar Jurdan ayirin i tmurt n ait Israelit missa (Altar).

22 12 Umi ait Israelit sran aya, tmun marra tamzyida n ait Israelit di Cilu, hįma ad ffęen ak idsen mmneęen.

22 13 Ait Israelit sskken axhan Binhas, mmis n Eleasar, ęar ait Rubenit, ait Gadit ed ęar wzyen n tqbitc n Manasse di Gilead.

22 14 Ak idsen ujurn 10 n izđjifn (zi qae twacunt), zi qae taqbite n Israel ijj n uzđjif; nitni zg izđjifn n twacunin n ifđn (ruruf) n Israel.

22 15 Umi nitni usind ęar ait Rubenit, ait Gadit ed wzyen n tqbitc n Manasse di tmurt n Gilead, nnan asen:

22 16 Ammu i tna marra tamzyida (jjmaect) n Arbbi: Min ix ad iini wufuy a x reahed, tggim akd Arbbi n Israel, i di thęydem ass a x Arbbi, tsbđdem missa thwrem zzais ass a Arbbi?

22 17 Ma afaryeđ nneę n Begur drus? (War dđi cfa aneę afaryeđ n Begur)? Zzais ęas ar ass a ead war nizdig ed x afs id twđa teti x tmzyida n Arbbi.

22 18 Kenniw maca thęydem ass a x Arbbi. Mara kenniw thwrem ass a Arbbi, ad ikkar uxęyeq nnes tiwcca akd marra tamzyida n Israel.

22 19 Mara zema tammurt n wem, war tizdig, xenni asttiwd awru ęar tmurt, n Arbbi ed mani tdja txzant n Arbbi, ed tggwujemd ęarney! Maca war hkkwret Arbbi ed war id aneę ssidifet zi man aya dg węwweę n wem, aqqa a' tsbđdem i ix n wem missa wiss 2, x uęzdis n missa n Arbbi, Arbbi nneę.

22 20 Ma war id iwđi uxggeq nnes x marra tamzyida n Israel, umi Axan, mmis n Serax, tuęa icarree di, min tuęa idjan i wxhed? Ed netta tuęa d ijj n waryaz. War dđi itwanę x ufaryeđ nnes?

22 21 Uca arrin ait Rubenit, ait Gadit ed wzyen n tqbitc n Manasse x izđjifn n ifđn n Israel:

22 22 Arbbi, wah Arbbi, Amqqran- Arbbi, wah Arbbi, Amqqran, netta issen i t ed Israel a t tssen: Mara aya d afaryeđ, mara tuęa d ahwar n Arbbi, xenni netta war id aneę iticc ass a fus.

22 23 Ma neccin nsbedd missa, hįma a' nęyyed x Arbbi, ed ma ad x afs negg tđbaxur ed ssađi ed tęaręt n wsgnfi, a' dais iarzu Arbbi simant nnes.

22 24 Urid ammu, neccin ngga aya zg wmnus, zg wxarres a: Ięnjirn n wem zmmarn tiwcca ad inin i ięnjirn nneę: Min jar awemd ak Arbbi n Israel?

22 25 Arbbi igga Jurdan d afraj (aębar) jar aneę, ix ad iini ait Rubenit ed ait Gadit. Kenniw war ęarwem bu tşyart di Arbbi. Ammu ad sbdden ięnjirn n wem ięnjirn nneę, x tiggwdi n Arbbi.

22 26 X uyenni nenna i ix nneę: Neccin a' nsbedd missa war dđi i tđbaxur war dđi tęaręt;

22 27 a' tiri d jjurit (ccahed) jar neccin ed kenniw ed jar tasutin (kintat) awarn aney i, aqqa neccin ntxmmes zzat aymbub n Arbbi zi tmgga n t̄tbaxur, tayaršt ed tyaršt n wsgnfi. Xenni war zmmarn tiwcca iħnjirn n wem ad inin i iħnjirn nney: Kenniw war ħarwem bu tšyart di Arbbi.

22 28 Neccin nxarres: Mara nitni tiwcca ssiwren ammu ħarney ed wara nney, ad asen nini: xzart maca di sshnet n missa n Arbbi, i sbdden imzwura nney, war dji i t̄tbaxur ed war dji i tyaršt, maca maħend nettat a' tiri d jjurit jar neccin ed kenniw.

22 29 Iggwej x afney, aqqa neccin a' nhwer Arbbi ed ass a a' x afs nħyyed, di mani neccin nsbedd missa wiss 2 i t̄tbaxur, ssdaq i n macca ed tyaršt x uyzdis n missa n Umqqrn, Arbbi nney, idjan ħar txzant nnes.

22 30 Umi axhan Binhas ed izdjifn imqqrnen n tmzyida (izdjifn n ifdn n Israel), inni tuya ħars, sran, min nnan ait Rubenit, ait Gadit ed ait Manassit, tuya yen dg wbrid.

22 31 Ed axhan Binhas, mmis n Eleasa, inna i ait Rubenit, ait Gadit ed ait Manassit: Rxxu nssen neccin, aqqa Arbbi aqge t jar aney; maħar kenniw war tarrzem bu reahed akd Arbbi. Zg wya kenniw tssnjmem ait Israelit zg wfus (iccaten) n Arbbi.

22 32 Xenni axhan Binhas, mmis n Eleasar, ed izdjifn imqqrnen jjin ait Rubenit ed ait Gadit uca arkkwħen zi tmurt Gilead ħar tmurt n Kanaan ħar ait Israelit. Nitni ħajan asen marra

22 33 ed ait Israelit tuya yen dg wbrid. Nitni qaden Arbbi, war xarrgen ead ad ffyen, ad mmnyen akd ait Rubenit ed ait Gadit ad arren tammurt txra, di tzdyn.

22 34 Ait Rubenit ed ait Gadit ggin as i missa jjurit (ccahed), maħar (nitni nnan): Nettat tbedd dg wmmas nney d jjurit i, Ajahw d Arbbi.

23 1 Edun aħtas n wussan, awarn i umi Arbbi tuya igga i Israel rhudnet zi marra isnga nnes ed Jusua tuya imyar dg wussan iwсар,

23 2 iraya Jusua i marra Israel, iwssura nnes ed izdjifn, rqađit nnes ed in idjan x lista (adlis n uzmmem) munen inna asen: Necc rxxu wsary mħary dg wussan.

23 3 Kenniw simant n wem ttrim, min igga Umqqrn, Arbbi n wem, ak marra rgnus a zzat i tiħtawin n wem; maħar Amqqrn, Arbbi n wem simant nnes immney i kenniw.

23 4 Xzart, necc bđiy awem tammurt n rgnus a, iqqimen ead, ed marra rgnus, i nyiy, zi Jurdan ħas ar ill amqqrn di mani tđji tfuct x tqbbar n wem d tašyart.

23 5 Amqqrn, Arbbi n wem, a' x afsen iazzer (ura imar) zzat i tiħtawin n wem ed a' ten itllee zzat i tiħtawin n wem ed kenniw a' tetffem tammurt n sen, mamec id awem t ieahed Umqqrn, Arbbi n wem.

23 6 T̄t̄fet maca rbda di, a' ttwqqarm a' ttggem marra, min iurin dg wadlis n rqanun (tura) n Musa; war x afs rħħmet ħar iffus ura ħar zrmed!

23 7 War tssurt ixf n wem ak rgnus a, i ħarwem iqqimen (icħten) ead; assayn (ismawn) n Arbbit n sen war ten tqqarm war ħarsen tjadjam, kenniw war id asen ttxmmsem ed war zzatsen ttadart,

23 8 maca a' tennem dig wmqqrn, Arbbi n wem, mamec i t tggim ħas ar iđa.

23 9 Arbbi itllee zzat i tiħtawin n wem rgnus d imqqrnen ħarsen tizmmar; ħas ar iđa war id awem izmmar ura ed ijj.

23 10 Ijj waha zzaiwem izmmar ad iđfar ifđ; maħar Arbbi, Arbbi n wem, itmnya simant nnes i kenniw, mamec i t id awem ieahed.

23 11 Hđat x uyenni tudart n wem aħtas, aqqa kenniw (rbda) a' ttxsem Amqqrn, Arbbi n wem.

23 12 Maħar mara kenniw thyydem x afs s tidett ed tqarnem ak rgnus a, ħarwem icħten ead, mara kenniw tmrcem x afsen, mara kenniw tssurm ak idsen ed nitni surn ak idwem,

23 13 xenni a' tssnem nican, aqqa Amqqrn, Arbbi n wem, war itizzer ead x rgnus a zzat i tiħtawin n wem. Nitni ad dwren d tasarrift ed d tisndect i kenniw, d rwtart i ieurar n wem ed d asnnan i tiħtawin n wem, ħas ar taggwjem zi tmurt a tašbħant, id awem iwca Arbbi, Arbbi n wem.

23 14 Necc simant inu ggury zi marra min idjan n tmurt. Kenniw maca a' teqrem s marra ur ed marra buħber, aqqa zi marra min ak idwem igga Arbbi, Arbbi n wem, ura ed ict waha war tqqim war tqfir; marra qfrent, ura ed ict zzaisent war tqqim.

23 15 Am maca ħas ar ass a iqfer marra min ak idwem igga Arbbi, Arbbi n wem, ammu ħa iqfer dg wussan id ħa iasen qaē asiggwed id awem igga, Arbbi, Arbbi n wem, ħas ar kenniw issufey zi tmurt a tašbħant, id awem iwca Arbbi, Arbbi n wem.

23 16 Mara kenniw tfturiem x rqarin (reahed) x afwem igga Arbbi, Arbbi n wem, mara kenniw txxmsen ed tudarm i Arbbit nneyni, xenni ad iary uxyyeq n Arbbi x afwem uca kenniw a' txram dya zi tammurt tašbħant, id awem iwca netta.

24 1 Jusua ismun marra tiqbbar (tiqbirin) n Israel di Sixem; netta irayad i iwssura n Israel, izdjifn imqqrnen nnes, rqađit ed in idjan x wadlis n uzmmem munen uca usind zzat i Arbbi.

24 2 Jusua inna i marra rgens (agdud): Ammu issiwer Umqqrn, Arbbi n Israel: Ayirin i iyzar zdyen imzwura n wem zg wachar uya (Terax, babas n Abraham ed Nahur) xmmen i Arbbit nneyni.

24 3 Uca iwieyd babatwem Abraham zg wayirin i iɣzar jjiy t iujur di marra tammurt n Kanaan. Necc arzfeɣ t s waɣtas n wara ed wciy as Isaak.

24 4 I Isaak wciy Jakub ed Esau ed necc wadjij i Esau tammurt n wdrar Seir, maɣend a' tiri nnes. Jakub maca ed iħnjirn nnes ujurn hwan ɣar Egibt (Masar).

24 5 Xenni sskkey Musa ed Aarun uca wtiy Egibt zi min, ggiy di Egibt. Awarn as ssufeyd kenniw

24 6 (necc ssufeyd imzwura n wem) zi Egibt ed kenniw tiwɣemd ɣar ill. Ait Egibt maca ɣfarn imzwura (rjdud) n wem s ikarrutn ed iysan ɣas ar ill n uyanim.

24 7 Uca syuyyen imzwura n wem ɣar Arbbi ed netta igga tadjest jar awem ed ait Egibt iija ill iusedd tiwa n sen, armi ten isybba. S tiɣtawin n wem tzrim, min ggiy di Egibt. Xenni tkkim aɣtas n wussan di tnzruft.

24 8 Necc iwieyd kenniw di tmurt n ait Amurit, izddyen ayirin i Jurdan. Nitni mmnyen ak idwem, maca necc ggiy ten dg wfus n wem; kenniw tetffem tammurt n sen ed necc qdiy ten di ɣtwee n wem.

24 9 Xenni ikkar ujdjid Balak n Muab, mmis n Zibbur, immney akd Israel. Netta issekk imsxxarn ɣar Bileam, mmis n Beur iija ad x afs rayan, maɣend a' kenniw ixza.

24 10 Necc maca war xsey ad srey bu axzi zi Bileam. S uyenni netta igga daiwem ttisir ed necc ssnjmey kenniw zg wfus nnes.

24 11 Xenni tzwam Jurdan tusimd ɣar Jeriku, imzday n Jeriku mmnyen ak idwem, ura ed ait Amurit, ait Berisit, ait Kanaanit, ait Hetit, ait Girgacit, ait Hewit ed ait Jebusit ed necc wciy ten i wfus n wem.

24 12 Necc sskkey anxrie ɣar zzat n wem. Netta iuzzer x x afsen zzat wem (2 ijdjdn n ait Amurit); aya immsar war dji s usabli nnec ed fritcat nnec.

24 13 Necc wciy awem tammurt, war tuya dais tmarrtem, ed ibilajn, tuya war tsbddem. Kenniw tzdyem daisen ed kenniw tccim zi tzayart ed uzmmur, tuya war tzzum.

24 14 Eggwdet rxu Arbbi ed txmmsen as di nnyet tiweɣ (tkmer). Ndart Arbbit, nni umi xmmsen imzwura n wem ayirin i iɣzar ed di Egibt, ed txmmsem i Arbbi!

24 15 Mara maca war id awem iejib, a' txmmsen i Arbbi, xenni afet ass a, i man wen umi txsem a' txmmsem: i Arbbit, nni umi xmmsen imzwura n wem ayirin i iɣzar, niy i Arbbit n ait Amurit, di tmurt n sen di tzddyem. Necc maca ed taddart inu, neccin nxs a' nxmmes i Arbbi.

24 16 Rgens inna: Aya iggwej aney, aqqa neccin a' nejj Arbbi a' nxmmes i Arbbit nneyni.

24 17 Maɣar Arbbi, Arbbi nney, d netta, id aneyd issufyen neccin ed imzwura nney zi taddart n ismyan n Egibt ed wen iggin rburhanat imqqrane zzat i tiɣtawin nney. Netta issrqa x afney di marra abrid, nujur, ed jar marra rgnus, umi ncuq tammurt n sen.

24 18 Arbbi iuzzer x marra rgnus, ura ed ait Amurit, inni izdyen awrud di tmurt. Ura ed neccin nxs a' nxmmes i Arbbi; maɣar netta d Arbbi nney.

24 19 Uca inna Jusua i rgens: Kenniw waqira war tzmmarm a' txmmsen i Arbbi, maɣar netta d Arbbi axadac (aqddus), ijj n Arbbi itasem; netta war id awem issuruf afaryeɣ n wem ed umarwas (ddnub) n wem.

24 20 Mara kenniw tjjim Arbbi txmmsen i Arbbit nneyni, xenni netta ad awem iħyyed, ad iawi ticti tiwa n wem ad awem isswjed qttu, waxxa netta igga ak idwem awrud tn taɣbhant.

24 21 Rgens maca inna i Jusua: Urid ammu, neccin nxs a' nxmmes i Arbbi.

24 22 Jusua iarra x rgens: Kenniw d imjjadja x ixf n wem (kenniw d ccwahed mgal n wem) simant n wem, aqqa kenniw tfarzem Arbbi ad as txmmsen. (Nitni arrin x afs: Neccin d imjjadja.)

24 23 Ndart rxu Arbbit n midden, ɣarwem ead idjan, ed tarrem urawn n wem ɣar Arbbi, Arbbi n Israel!

24 24 Rgens inna i Jusua: I wmqqrane, Arbbi nney, nxs a' uxmmes ed a' nser ɣar tmijja nnes.

24 25 Ammu igga Jusua dg wass nni ijj n rqarin (reahed) i rgens iwca i rgens abrid (rqanun) ed tidett (rħeqq) di Sixem.

24 26 Jusua iura marra awaren a dg wadlis n rqanun n Arbbi netta ixsi ijj n wzru d amqqrane uca isbedd i t di Sixem adu ict tbdjuɣ (asklu n rbdjuɣ), ibdden ɣar txzant n Arbbi.

24 27 Inna i marra rgens: Xzartiwɣ awru, azru a ad iiri d ceahed (amjjadju, wenni izrin) x afney; maɣar netta isra marra awaren n Arbbi, inni id ɣarney issiwer. Netta ad iiri d ijj n ceahed x afwem, maɣend war ttqnem tiɣtawin x Arbbi n wem.

24 28 Xenni iarxu Jusua i rgens, ijj ijj ɣar tsɣart (wagra) nnes.

24 29 Awarn i timsarin a ixsi Jusua, mmis n Nun, ismey n Arbbi ɣars 110 n isggwasn.

24 30 Itwander di Timnat-Sirax, di tmurt n tsɣart nnes x idurar n Efraim, snnej i wdrar Gaac.

24 31 Israel maca ixmmes i Arbbi, min ikka Jusua iddar ed min tuya kkin iwssura ddarn, inni iqqimen awarn i Jusua ssnen marra, min tuya igga Arbbi i Israel.

24 32 Ixsan n Jusef, tuya id iwien ak idsen ait Israelit zi Egibt, ndren ten di Sixem di tyɣa, tuya isya Jakub x iħnjirn n Hamur, babas n Sixem, s 100 Kesita (100 n muzunat n nnuqart); tuya tdwer d taɣart n wara n Jusef.

24 33 Ura ed Eleasar, mmis n Aarun, iksi (immut) itwander di Gibea, (abilaj) n mmis Binhas, tuya id  
as immwccen dg idurar n Efraim.